

**ASO TOFI, 25 FEPUARI 2021**

*Na nofoia e le Sui Fofoga Fetalai le Nofoa i le itula e 9:17 i le taeao e tusa ai ma Tulafono Tumau 27(1).*

Tatalo.

**SUI FOFOGA FETALAI:** Ou te faasilasila atu ua toe amatalia nei Taulumaga a le Fono Aoaio Faitulafono.

Ia, ou te muai faatalofa atu foi i lenei taeao i le paia o le Maota, i le afio o lau Afioga i le Palemia, mamalu i le Kapeneta ae faapea foi Minisita Lagolago. Ia, lea Itu o le Malu i a outou Afioga i Taitaifono o Komiti Tumau Faa-Palemene, ae a le mamalu o sui usufono filifilia o le Fonousu a le atunuu. Ua tatou tepa i ula ua tagai i malo i lenei taeao, taeao fou i le alofa o le Atua e faaauau ai le tatou galuega. E i ai lou talitonuga o lea ua pale i le papa ma le oneone o tautai le sa maualuga o le Palemene. E pei o le muafetalai e fai i Nuutele ma Nuulua, aua ua momoli mai e le Atua soifua lo outou soifua lagimama ma so matou ola i lenei aso fou e faaauauina ai a tatou galuega.

Ia, viia le Atua, le Atua o lo o faavae i ai Samoa, ia faia mea silisili mo ia. E i ai le lagona ia alofagia e le Atua ia aualiitia usugafono o lenei aso. E faatalofa i le maleifua mai i faguga lelei o le paia o le atunuu i la outou silasila maimoa mai, matou ofo alofa ma faafeiloai atu. Tapuai maia o lea o le a alo lau Palemene mo lana Fonotaga o lenei aso.

E tolopo taulumaga o le Fono Aoaio i le po anapo ua lamalama faaiu le saunoaga a le Afioga i le Minisita o Galuega, Felauaiga ma Atinae Eeseese. O le mea lea, i le faaaloalo ou te tapa ai lau Afioga i le Minisita e faaauau ma faamaea mai lau saunoaga i lenei taeao.

**TULAFONO TAU FAAOFI O LE FAATATAUINA O TUPE  
FAAOPOPO (NU.1) 2020/2021 – felafolafoga faaauau i luga o le  
faitauga faalua – Aso 27**

**Susuga Hon PAPALIITELE NIKO LEE HANG (Minisita mo Galuega, Felauaiga ma Atinae Eeseese):** E momoli atu le faafetai i lau Afioga i le Fofoga Fetalai mo le isi foi avanoa ua tuuina mai e faaauau ai le lauga a le sui usufono nei, ona sa taumafai atu lava i le po anapo e

faamaea, ae peitai ai lava o le finagalo lea o le Atua, 2 po 2 ao e faaauau ai lau lauga. Ae le afaina lea tulaga ua uma ona faailoa atu, nai mataupu puupuu lava ia e toe faauma atu ai le lauga i lenei aso.

Ia, e fia piiama foi lenei usugafono i le faafetai ma le viiga o le Atua i lenei taeao. E faafetaia ai pea ma viia le alofa ma le agalelei o le tatou Matai Sili ua maua mai e tatou lenei aso fou i so outou soifua laulelei ma so matou ola.

A o le i faaauauina le lauga, e muamua ona ou faamalulu atu i au Pulega ia e 3, na misi lava anapo, e le o se misi foi lea na faamoemoeina, o le misi lava ona pau lava ua mix up uma pepa. O lea e avatu ai le faamaluluga i le kamupani vaa, le SSC aemaise foi le SSS, ia ma tatou kamupani foi lea o le PFL, ae le afaina o lea ua toe tuu mai le avanoa e le Afioga i le Fofoga Fetalai e toe faaauau atu ai lau folasaga i lenei taeao, viia ai le Atua. Sa misi foi i lau faamatalaga mea ia o taligalu, lea sa lauga ai foi le sui usufono mai Lauili aemaise foi le sui usufono mo Safata, ona o tulaga foi ia o faiga faavae a le Malo. Na o le pau lava taligalu e fesoasoani i ai le Pulega o le LTA, na o taligalu foi ia ua tau aafia ai le auala mo aseta ia o lo o vaaia e le LTA, auala ia taavale, ona o lua talosaga e le lavea i le lio lea o taligalu o lo o aafia ai auala tetele. Ae o lea la o le a sui faiga faavae, ona e le o toe maua se tupe mai fesoasoani ia e auala mai i le MNRE e faatino ai ia tulaga. Ae masalo se taimi toe maua mai, a o lea o le a taumafai le LTA e faatupe i ana tupe foi ia le fuafuaina ina ia faataunuu ai lea faamoemoe. E le o faagaloina le lua mataupu, ona sa laga foi e le Afioga i le Palemia, o lea o le a taumafai le Malo e saili se seleni ina ia faataunuu ai, ona o le aafiaga o le siosiomaga o a outou afoaga.

Lau Afioga o le Faalapotopotoga lea o le SSC, o galuega faatino i le Nofoaiga nei 2016-2021, o le faaleleia o le nofoaga mo le faatautaia o uta ma taavale faapea le car park i Salelologa. Faaleleia le fale faatali pasese i Mulifanua, faalolotoina o le ava i Mulifanua, ua maea ona faatino lea galuega tele.

**SUI FOFOGA FETALAI:** Malie le Afioga i le Minisita se i tulai mai le sui usufono mo Anoamaa Sasae.

**Afioga Alaiasa Muagututi’a Moefaauouo Malagaitutogiai Sepulona Moananu (Anoamaa Sasae):** Lau Afioga i le Fofoga Fetalai, ia leaga o lea ua saausi lava le saunoaga a le Afioga i le Minisita. Faafetai foi i le alofa o le Atua o lea ua e sisi le atumua i le Atua i lenei taeao aua lo tatou va tapuia ma le Atua e ala i le taulaga molia e lau Susuga. E i ai lava nai mea ia sa taua e le Minisita pei la o le mea o le taligalu, ia ai ua galo i le Afioga i le Minisita sa taua i lana saunoaga i le isi aso le taligalu o Falefa. Na ona tuutuu atu lava i autafa o lau Afioga i le Minisita. A o lea ua tau mai na o Lauili ma tua i Saanapu, ae pei ua tau pau ai i le Afioga i le

Minisita sa... Ae o au ou te nofo i le vaimea lea i Vaitele, o lo o i ai si ou fale o lea ou te nofo ai nei i Vaitele. Sa saunoa foi le Minisita i le tulaga lea o le atinae o le uafu, le poloketi lea a le tatou Malo. O sui usufono nei e moni lava e nonofo i itumalo i tua a o lea e alaala i i. E matua lagolagoina lava le faamoemoe o tatou atinae nei, leaga e le gata o le atinae e manuia ai Samoa, ae manuia ai lava le matou pitonuu lea i Vaitele, Vaitele-uta ma Vaitele-fou ma i i Aeale, ma Faleula. O nuu uma lava nei o le a faamanuiaina ai nei e le na o Vaiusu, e tataua ona tatala uma nei atinae mo le manuia o tatou tagata.

Lau Afioga i le Minisita, toe tasi lava si mea lea lau Afioga, o lea ua taua e tele le tupe lea o le a faaleleia ai afi ia e i Lalomauga, ia ma toe faalapoa le capacity o le eletise o le a maua mai ai i Lalomauga. Ia ae na ona tuutuu atu, e vave ona leaga taavale a le EPC i le leaga o le auala lea e alu i Lalomauga faamolemole lau Afioga, pe na o se kilomita lava ma le afa e faaleleia ai le auala mo si o matou nuu lea. Ma le agaga faaloalo. Ia manuia le tatou Fonu.

**SUI FOFOGA FETALAI:** Se i tulai mai lau Afioga i le Minisita.

**Afioga Faumuina Asi Pauli Wayne Fong (Nuu Tu Taulaga Sisifo):** Lau Afioga i le Fofoga Fetalai, faamolemole pe maua se avanoa.

**SUI FOFOGA FETALAI:** Malie le Minisita se i tuu atu le avanoa i le sui usufono mai le itumalo Tu Taulaga i Sisifo.

**Afioga Faumuina Asi Pauli Wayne Fong:** Ia, e momoli atu le faafetai tele i lenei taeao i lau Afioga i le Fofoga Fetalai, aemaise foi le alaala mai o le Afioga i le Palemia aemaise foi le mamalu o le Kapeneta. E faamalulu atu foi ona o le tulaga ua i ai lenei taeao, ia lea ua ou faalogo atu ua talanoaina le uafu i Vaiusu. Ae ao pea ona avatu se manatu e faamauiina ai le tetee o lenei sui usufono i le tulaga o lea faamoemoe. E matua le taliaina lava e lou nei sui usufono le tulaga lea i le uafu lea i Vaiusu, po o le Vaiusu bay, po o Faleata atoa. Ona o le agaga lava ia o lo o naunau i ai, o lo o naunau le Malo i tupe e maua ai, a o lo o naunau le matou itumalo i taumafa po o figota o le sami e matou te ola ai.

Ia pei o le tulaga lea e toe faapoopoo atu ai i lenei itula. Ia manuia lava le Fonousu.

**SUI FOFOGA FETALAI:** Faafetai.

**Susuga Hon Laauli Polataivao Leuatea (Gagaifomauga Nu.3):** Lau Afioga i le Fofoga Fetalai mo le faasaoina o le taimi o le Minisita, e fia maua se avanoa faamolemole.

**SUI FOFOGA FETALAI:** Ia, se i tuu atu le avanoa i le sui usufono mo Gagaifomauga Nu.3.

**Susuga Hon Laauli Polataivao Leuatea:** Faafetai. E tautala lava ma le faaaloalo lau Afioga i le Minisita, ona o nai mataupu lava i tulaga o faalavelave faafuasei. O lagona ia o le a avatu o lagona mai faafeagaiga o le motu o Manono ina ua matou asiasei i Manono i le aso lea na matou o ai. Faamolemole, matou te taunuu atu lau Afioga, ua 3 vaiaso o pe le paipa. Faamolemole se i silasila ane lau Afioga i le Minisita. E faamauina leaga na momoli ane lava le manaoga lenei.

Lona lua o le motu i Apolima, e na o le tai-tolu, tai-fa itula e ola ai le paoa. O le ala lea o le momoli atu i le agaga faaaloalo i lau Afioga.

**SUI FOFOGA FETALAI:** Ou te faamalulu atu i le sui usufono mamalu o lo o saunoa, malie le sui usufono mamalu e le faatagaina e le Nofoa ni lagona fou ma ni manatu fou, e te le i saunoa i ai.

**Susuga Hon Laauli Polataivao Leuatea:** Lau Afioga, o faalavelave faafuasei na momoli mai ananafi.

**SUI FOFOGA FETALAI:** O lea ua maua. Ae ou te iloa e le mafai ona e toe taua nisi mea fou e te le i saunoa i ai i lau lauga autu.

**Susuga Hon Laauli Polataivao Leuatea:** Ou te iloa ou te le i taua. Lau Afioga na ou tautala ona e le i taua i lau lauga.

**SUI FOFOGA FETALAI:** E te silafia le sui usufono le mea lea ou te talanoa atu ai. Alaala mai lalo. Tuu atu le avanoa i lau Afioga i le Minisita o Galuega e faaauau ai lau saunoaga.

**Afioga Aliimalemanu Alofa Tuuau (Alataua Sisifo):** Lau Afioga i le Fofoga Fetalai faamolemole pe maua se avanoa.

**SUI FOFOGA FETALAI:** Ia malie lau Afioga i le Minisita se i tuu atu le avanoa i le sui usufono o le Alataua Sisifo.

**Afioga Aliimalemanu Alofa Tuuau:** Faafetai mo le avanoa. Meamanu lea e le i see ese le tatou mataupu i le uafu lea i Vaiusu, o le mea lenei sa fia tulai atu ai.

O lau fesili i lau Afioga i le Minisita, o fuafuaga alualumamao po o fuafuaga ia i le vaaiga mamao lea e taua ai le \$100 miliona lea e aumai ia Saina, o se nonogatupe po o se tupe faameaalofa lea e tau o le grant? O lau

fesili lena. A o lena foi tupe, na tatou talosaga i ai po o Saina lava ia na aumaia ia tatou? Faafetai mo le avanoa.

**SUI FOFOGA FETALAI:** Avatu le avanoa lea lau Afioga i le Minisita o Galuega e te saunoa i mea ia ua taua.

Malie sui usufono mamalu o lo o tutulai mai, e fai le faaiuga a le Nofoa. Ia, o le a tuu atu le avanoa i le Afioga i le Minisita e fia talifuaitau i le...

**Afioga Alaiasa Muagututi'a Moefaauouou Malagaitutogiai Sepulona Moananu:** Leai na o se mea lava e fia faasao lau Afioga i le sui usufono lea na... e pei o le a agai mai ia te au lana lauga i le uafu, ae o le uafu na talanoaina anapo e le Afioga i le Minisita, lea na ala ai ona avatu matou manatu. A o lea e pei o le a agai mai faapea o au lea na laga le... e leai, o le mataupu na laga e le Minisita anapo, ae leaga e le i auai le sui usufono. Ia ma le agaga faaaloalo.

**SUI FOFOGA FETALAI:** E le afaina lea, o lea ua fai le faaiuga a le Nofoa, o le a saunoa le Minisita e tusa o saunoaga e pei ona agiga i le Maota...

**Afioga Peseta Vaifou Tevagaena (Faasaleleaga Nu.4):** Lau Afioga i le Fofoga Fetalai, ona o le mataupu sa ou...

**SUI FOFOGA FETALAI:** Malie le Minisita se i tuu lava le avanoa i le sui usufono mamalu mo Faasaleleaga Nu.4. O le mataupu sa ou laga a o lea e le i...

**Afioga Peseta Vaifou Tevagaena:** Faafetai mo le avanoa. Talu ai ona o lea ua toe maua le avanoa o le tulaga lea pei ona aumai foi e le sui usufono mamalu le auala i le afi foi lea i o i Lalomauga. Ae tasi lea mataupu sa ou laga, ona o lea na saunoa i ai le Taitai o le Malo i fuafuaga alualumamao a le tatou Malo i le taulaga, ona o lea o le a siitia le fausiaina o auala i le lumanai. O fuafuaga ia alualumamao a le Malo.

O lau tuualalo lava i lau Afioga i le Minisita, pe toe silasila ifo le Matagaluega, pe le o le taimi lenei e tatau loa ona fai loa ni lapataiga, aua o le toatele o i latou o lo o nofoia le taimi lenei, o la e ua faafogafoga mai i le fuafuaga alualumamao a le Malo, a o lea ua matauina, e i ai isi galuega ia ua fuafua o le a fausia.

E pei o se tuualalo, na ona tuualalo atu pea i lau Afioga i le Minisita, pe le tatau loa ona faalauiloa i le mamalu foi o le atunuu, o lea o le a fuafua e le Malo pe mita le maualuga o ia auala i le lumanai, ina ia fai fuafua i ai a latou galuega. Aua a silasila lau Afioga, e 3 lava fale ia ua sii nei i luga faavae, o le manaia ia. E i ai le Lucky Foodtown, e i ai le fale lea o le

Maali i talaane o le Western Union, ia ma Amau. O le manaia ia, ua ova mita le maualuga o faavae o fale ia, masalo o lea ua fai fuafua lava pei o le mea lea na saunoa i ai le Taitai o le Malo.

Ia na pau lava lea o si vaega lau Afioga. Ma lou faaloalo.

**SUI FOFOGA FETALAI:** Ia, o lea ua maua. Ma e ou te...

**Susuga Mulipola Leiataua Laki (Aiga i le Tai):** Lau Afioga i le Fofoga Fetalai, faamolemole o se avanoa laitiiti, e le gata o le vaega sa taua e le lauga a lenei sui usufono...

**SUI FOFOGA FETALAI:** Ia, o le a tuu atu le avanoa i le sui usufono o le Aiga i le Tai, ina ne i faapito foi se matou galuega i nisi sui usufono. Ae talitonu ua manino lava le saunoaga a le Afioga i le Minisita i le po anapo. Ae saunoa le sui usufono.

**Susuga Mulipola Leiataua Laki:** Faafetai i lau Afioga. E fia fono faapipii foi e ala i le taulaga osi i lenei taeao pei ona saunoa i ai lau Afioga i le Fofoga o le Maota. Viia le Atua ua tatou feiloai i magafetausoifua e pei o le tala e fai ia Leutogitupaitea, ua outou silasila mai matou matamata atu. Faafetai i lenei taeao. O tulaga i taligalu, o le isi lea vaega e ese le taua i le lauga a le itumalo lenei talu ona ou tulai mai. E faapito augafa lava lau talanoa i taligalu o si ou motu o Manono-tai. Ia o lea ua molimauina lava tulaga i le afaina o le siosiomaga o le motu ona ua afaina lava ona taligalu ua aia faasoloatoa. O lea foi sa taua i lau lauga faamavae lau Afioga. Na ona toe faamanatu atu i lau Afioga i le Minisita tainane foi le faafofoga mai a si ou itumalo ma lou nuu, ina ne i matau mai po o le mea ea o nofonofu le sui usufono iinei i le Maota.

Ae i ai le talitonuga, ia o lea lava ua taatia faiga faavae a le tatou Malo, ia ma o lo o faamatafai foi ona faasolosolo atu le tulaga o le faagasologa o le tatou galuega, ia ae pei o le mea lava lea o le faalogo mai i lau Afioga. Ona o le mea moni, o isi ia vaega sa toatuga ai foi le taofi i le aso ananafi. E le i uma atu lau folasaga i le ananafi lau Afioga ona o le mea lava lea o lea e faaeteete i ai i le o i tua o isi tagata ia e soli fua itumalo ma nuu o isi faipule. Silasila foi, o lea lava e nofo atu le faipule. E sao le saunoaga lea na aumai e le sui usufono lea na faaoo ifo e se tasi o faifeau i le latou mafutaga le vai lea.

Na mafua ona oo i ai le saunoaga a le faifeau e faapea, e mafua ona tetele timuga i le aso, o le tali o a matou tatalo, tali o a matou tatalo ona ua leai se vai. A o le taimi nei lau Afioga i le Fofoga Fetalai mo le silafia aemaise foi o le faafofoga mai a lou nuu ma le itumalo, o lo o galulue le Ofisa o le Vai i le taimi nei, e le o malolo, toetiiti faa-sefulu ona ou talanoa i le Afioga i le Pule Sili ma i latou o lo o nafa ma matafaioi ia. Silasila foi, a tau loa le

vai o Manono e le faatusa lava i ai se isi vai o le atunuu lenei i le vai o Manono leaga e alu i le alititai. E le faigofie le galuega o lo o feagai ma le Pulega. E le o nofonofo la le Pulega o la e gaoioi, o la e galulue. Ma o lo o taumafai foi le nuu ma le afioaga e ofo le latou auaunaga ia i latou o e o fagotaina le alititai e tofu le vaega lea. Aua a silasila foi a oo ina leaga le tau, a oo na nefu ma taavilivili le gataifale e ala i le fetafeai o le au, e fiu lava le au atamamai lea e i ai e tau saili le vaega o lo o liki ai le mama i lalo.

O mea la ia, e talanoa i ai le sui usufono aua e malamalama i lona siosiomaga ma le mea o ola ai. Ae faanoanoa o le aumai fua, o lea e nofo le sui usufono. O le ala lea e ala ai ona ou fai atu, aua le sopo fua le pule ao i le pule po. O lea lava e nofonofo le sui usufono o Aiga i le Tai, e le o moe. O le sui usufono lenei ou te fai atu, e le iloa po o le a se vaega ma se vaipanoa o le nuu lenei e le oo i ai lau... E oo lava i moli e pe i le auala, e lipoti lava e le sui usufono. O lea e faafofoga mai le EPC. Sole, leaga e faatiga taliga, e alu au asiasiga i magaala uma e alu i tua ma le...

**SUI FOFOGA FETALAI:** O le tuualalo i le sui usufono o lo o saunoa, o le a toso ai le tatou Fonotaga i mataupu fou ia e te saunoa i ai.

**Susuga Mulipola Leiataua Laki:** Ia, lau Afioga, e pei o nai vaega ia aua e tatau lava ona faapulapula aua foi le silafia a i latou o...

O le tulaga foi o taligalu lau Afioga e afua ai se faamatalaga...

**SUI FOFOGA FETALAI:** Na o mea lava na e saunoa i ai i lau lauga e tatau ona e saunoa i ai, o le tatou Tulafono Tumau lena.

**Susuga Mulipola Leiataua Laki:** Sa taua foi o lo o fai lava galuega a le nuu nei, toetiiti lava o aso Gafua o masina taitasi, e o taulelea e lau le maa e tau fau ai le taligalu lea lau Afioga. Ioe. O le ala lea e mamafa ai lava i le lauga, leaga o lea foi e avatu i le manifesto a le vaega lea fai mai e o atu fai taligalu. Ae faanoanoa lava lau Afioga, sa ou lauga i le 2018 i le taligalu, ou te faanoanoa lava i le tali a le Afioga i le Sao Faapito a o seei mai i le nofoa i le Minisita o le Siosiomaga. Fai mai lana saunoaga, e pei au o le isi Minisita o Galuega i le tou lauga mai i taligalu, taligalu. A o le fesili, o ai a lauga i ai? A o lea la ua o folafola i lou nuu, o le a o atu e fai taligalu. A o lea na lauga atu i ai ae fai mai e le o ia o se Minisita o Galuega, a o le Minisita o le Siosiomaga e nafa ma vaega ia. O lea la lau Afioga i le Palemia, e i ai faiga faavae...

**SUI FOFOGA FETALAI:** Ia, o lea ua maua, o lea ua maua e le Maota lou finagalo. O lea foi e faafofoga mai le itumalo. Malie le sui usufono aua le tosoa i tua le tatou Fono. O le avanoa mo le Afioga i le Minisita.

Malie sui usufono o tutulai mai, o le a toso le tatou Fono o le a tatou o i tatou Tulafono Tumau, e le manaomia ni mataupu fou. Afai e te le i lauga ai i lau lauga autu, ou te le toe faatagaina. O le avanoa mo le Afioga i le Minisita.

Se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegai (Palemia):** Lau Afioga i le Fofoga Fetalai, ona o lea ua lotea mataupu tau faiga faavae lautetele a le tatou Malo, e tatau ai ona ou tulai atu e faamalamalama atili e fesoasoani e lagolago ai le saunoaga a le Afioga i le Minisita. O mea ia o taligalu, e i ai taligalu e faatupe mai fafo, e alu lava la i faiga faa-fafo. Ae i ai taligalu e mafai ona faatupe mai i a tatou lava tupe. O i la, e faaoga i ai le common sense. E faaoga i ai le tofamamao a le Kapeneta. O lea la ua saunoa atu le Minisita e mafai ona faatupe mai, ma o lea ua tau atu e le Minisita le auala e faatino ai. A oo la i tupe a le tatou Malo, faaoga le common sense, mea o le faautaga fetalai. E i ai le upu a le atunuu e fai i le uta fetalai, o le uta lena a le potu. Ae tatau loa la ona ou faapea atu, i upu tuusao manino, o le uta taofiofi o le uta a le vale. E le o faafoea le Malo lena i se uta a se vale, o lea e faafoe i le uta fetalai. E le mafai la ona tatou laasia faiga faavae e aumai ai tupe a fafo, ae mafai ona faatino a i tatou seleni, o lea o lo o i ai le tatou saolotoga. O le faiga faavae lautele lena ina ia tali atu ai le pogisa lea e tulai mai pea.

O le isi faiga faavae, o mea nei o mataupu e aafia ai itumalo, o le mafuaaga lena... o le galuega tonu lena a le faipule o le itumalo, o le galuega tonu lena a pulenuu a le itumalo, ae le sau fua le isi aitu talanoa i mataupu a le isi nuu. O le a le uiga o le mea lena? Ua aliali mai ai le fia lelei, pei e foliga mai e faaleaga le galuega a le faipule, o lea e tu i lona itumalo. O faiga faavae na a le Malo, e faavae mai luga o le common sense. Sau oe e talanoa i mataupu a lou itumalo. O le a la le faitau mai a lou itumalo? Ua e alai tele i mea a isi, pupu i o ma o ma o, ae faapefea mea tau i totonu o le lotoifale na tofia ai oe? O le mea lea o le fia lelei. O le fia lelei. O le a le mea e te alu ai fua fai au talaiga i le lotoifale o le isi faipule? Se o le mea lena e tupu ai le vevesi.

O le isi faiga faavae. A faapea e faaletonu se moli, o lea e i ai le faipule po o le sui o le Malo latou te aumaia toa-tolu, e le gata o le sui o tina, sui o alii ma le faipule. E toa-tolu la latou e omai e aumai le latou mataupu. E aumai i i e faafoefoe atu ai. A aumai la, o le mea lena a le EPC e fai, e o atu e faaleleia se moli o se afioaga, ia po o le vai foi. Lau Afioga i le Fofoga Fetalai, e ala ona vevesi le Maota lena, o le tago fua o le isi i le mea a le isi.

Lau Afioga, o le tulaga lea i le siosiomaga, a o le i faia se atinae, e vaavaai lelei le tatou siosiomaga i le aafiaga, ma faataoto ai foi tulaga o lea



atinae ma lea atinae. O le uafu la lea o le a fai i i i Vaiusu, e le o aafia lava le togatogo, e le o aafia. A o le mea lea o le alu pogisa, se o le mea lea e tupu ai le vevesi, o le alu pogisa. E i ai le upu foi lele, look before you leap. Ae e te le i oso, vaavaai ou luma pe le o se omo ga, i e oso atu e pau i lalo e oti. Aisea? O le leai o se faautautaga. O mea uma lava e faatino i le faautautaga tatau. O le fesoasoani atu lena. Mo faiga faavae e faavae i luga o le utauta mamao, o le uta a le a? O le uta lena a le potu. Manuia le tatou Fono.

**SUI FOFOGA FETALAI:** E masalo o lea ua saunoa le Malo, ma o le faaiuga foi lea o le mataupu lea. Malie le sui usufono ua tulai mai, o lea ua ou faia le faaiuga. E le o taua lou suafa, malie le sui usufono, e leai se mea o le a e saunoa ai, e le o taua lou suafa.

**Afioga Faumuina Asi Pauli Wayne Fong (Nuu Tu Taulaga Sisifo):** Taumafai atu lava e faafetai atu i le Afioga i le Palemia, o lea e sao lelei lava le Palemia. Aua le alalai fua le isi sui usufono i le itumalo o le isi sui usufono. O lea la e momoli atu ai le faafetai, aua tou te alalai fua i le matou itumalo. Ae faafetai lava.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ua fai lava si le usitai o le sui lea i lau faatonuga. Ua fai lava si soli Fono. Se tau tuutumamao le tofa. Ua fai si soli Fono.

**SUI FOFOGA FETALAI:** Malie le sui usufono se i alaala mai lava i lalo.

**Susuga Hon Laauli Polataivao Leuatea:** Malie lau Afioga i le Fofoga Fetalai, se tuu mai se avanoa...ua faafofoga mai i upu o lenei taeao e faauigalua...

**SUI FOFOGA FETALAI:** O lea foi ua talosaga atu le Nofoa. Ia malie alaala mai i lalo se i fai atu se faamatalaga a le Nofoa...

**Susuga Hon Laauli Polataivao Leuatea:** Lau Afioga i le Fofoga Fetalai, malie lau Afioga, tuu mai se avanoa. O lea matou te tatalo atu e tuu mai so matou avanoa. E le talia upu ia, faamolemole.

**SUI FOFOGA FETALAI:** Alaala i lalo i lou nofoa.

**Susuga Hon Laauli Polataivao Leuatea:** Faamolemole Nafaitoa aumai se avanoa.

**SUI FOFOGA FETALAI:** O lea e foliga mai o le a aoao ma faatonu mai le Nofoa. E talu ai lo outou le tauagafau, lo outou le utagia o se tuualalo a le Nofoa. O le mea la lea, malie sui usufono mamalu o lo o fia saunoa. O lea ua manino atoatoa le saunoaga a le Malo i le mataupu lea. O le mea lea, o lea o le a tuu le avanoa ne i toso le tatou Fono, ae umi ai le tatou taimi. O le mea lea, lau Afioga i le Minisita ou te manatu le Minisita, ou te manatu o lea ua maea le mataupu, ae lelei ona faasee mai loa i nisi mataupu. E leai foi se mea o le a toe taua ai, ua maea lau saunoaga i le mataupu lea i le po anapo. E le afaina pe afai e le i Fono le sui usufono mamalu, aua le toe taea. O le talosaga lea a le Nofoa. Faasee lou vaa ma faauma mai lau lauga, ua le o toe umi foi se taimi. Ma le faaaloalo.

**Susuga Hon Laauli Polataivao Leuatea:** Lau Afioga i le Fofoga Fetalai, se malie lou finagalo. O le emergency lea na avatu ai lau tala. E 3 vaiaso o pe le paipa, e le o se isi lava itu. E 3 vaiaso o pe le paipa o Manono, o le tala lena.

**SUI FOFOGA FETALAI:** Ua faasoesa i le Nofoa, o le uiga le migao lea.

**Susuga Mulipola Leiataua Laki:** Se ua tele tele lou aia sole, alu oe e talosaga i o i lou itumalo, aua e te aia fua... o la e fai le galuega a le sui usufono.

**SUI FOFOGA FETALAI:** Malie le sui usufono mo Aiga i le Tai, alaala mai lalo i lou nofoa.

**Susuga Hon PAPALIITELE NIKO LEE HANG:** Ua fia faamaea atu le lauga, e 3 aso...

**SUI FOFOGA FETALAI:** Se i utagia se fautuaga a le Nofoa, o lea lava e mau lava le toovae. Taofi iumaea le mamalu o le Palemene e le Nofoa, a ou aapa loa i isi tulaga, ona faigata lea o le tatou va nonofo. Ou te talosaga i sui usufono mamalu, ia tausi lo tatou va lena. O le faasoesa pea i le Nofoa ma faasoesa pea i le Nofoa, o le uiga le migao lena, contempt of Parliament. Ou te le i manao ou te nanu i le taeao lena, ae o lena foi tou te silafia le background o le Nofoa. O le taaloga a le tamaloa. O le mea lea malie sui usufono mamalu, lava papale pea. O lea lava e i ai le Nofoa e faafoefoe lo outou finagalo. Ou te tapa lau Afioga i le Minisita, faaii mai lau saunoaga.

**Susuga Hon PAPALIITELE NIKO LEE HANG:** Faafetai i lau Afioga. E faigata ona faauma lau Afioga, ona o le tele o faauilavea. Ua tele

ina galo isi tuualalo ia na aumai. Ae faafetai o lea e record uma e lau computer.

**SUI FOFOGA FETALAI:** Ia faaauau pea lau saunoaga aua le toe amanaia. Faaauau lau saunoaga ma faamaea mai.

**Susuga Hon PAPALIITELE NIKO LEE HANG:** O lea faatoa amanaia mea ia, le pa motu i tua leaga e le talafeagai. O le saunoaga foi a le sui usufono lea laititi, o lea e aumai lona ia finagalo na o ia, na o ia lava i lona self interest, a o lea e taatia le finagalo o le itumalo. Ua toatele sui o le tou itumalo alii ua oo mai ia te au, faafetai ma faamalo mai i le poloketi lea. A o lenei lava e te tetee, tetee, tetee lava. Na ou talanoa i le mataupu lea anapo, ona tou te le i afifio mai. E i ai foi la le mataupu lea na laga mai e le tou taitai ia Laauli. O le vai lea i Manono, e le 3 vaiaso o pe. E tasi le vaiaso na pe ai, la ua maea ona faalelei. Ma o saunoaga foi ia e le faamaonia, e pepelo, o le tulaga lena o lea e tau faasao atu. Na fai foi lau talanoaga i le galuega tele lea e fai i Manono i le alititai, ona o le paipa e alu i lalo o le sami. Na faamanino lelei le tulaga i le tapenaga a le Pulega o le Suavai. A o lea foi ua tou omai, aua tou te le i omai anapo, toe lagalaga mai mea na talanoa anapo. O le faanoanoaga lena ia te au, ona e tele lou taimi na alu anapo e faamatala auiliili tulaga ia, ae o lea foi ua outou afifio mai, tou te le i omai anapo, toe lagalaga mai nei mea. Ia faamalulu atu, ou te le toe tali atu i ni a outou faauilavea.

O le faauilavea a Peseta, e masalo e tasi foi lea sui usufono e le o faalogologo i le folasaga anapo. Na alu atu uma lava i tapenaga ia le faatinoga o Tulafono, e puipuia ai le gataifale i i, i le taulaga ina ia tapena le fausiaina o maota ma laoa, ina ia maua le maualuga lea. Ae se i tagai i le lipoti lena i o i le Matagaluega o Galuega, i tulaga ia e tataua ona fau ai fale i i i le taulaga.

E pei o le taligalu a lou uso lea mai Falefa, e i ai le mafuaaga na ou le taua ai le taligalu. E leaga o lea ua leva ona faamauina i faamaumauga, ma o le mea taua o le faamauina. Ae le aoga... ona toe faapea le Palemene, ou te faaauau i le ta afioaga, e leai, o la ua taatia le ta taligalu. E maua loa le se tupe, le LTA lea e saofafai mai o, ia faamuamua le taligalu o Falefa faamolemole. A o isi la mataupu ia lau Afioga...

**Tofa Lealailepule Rimoni Aiafi (Faleata Sisifo):** Ia malie lava lou loto lau Afioga.

**SUI FOFOGA FETALAI:** Se o lea ua faauma le lauga a le Minisita.

**Tofa Lealailepule Rimoni Aiafi:** E leaga e le i oo i le mea sa ou lauga ai faamolemole. E tasi lava le minute.

**SUI FOFOGA FETALAI:** Ia malie lava le Minisita, se i tuu le avanoa i le sui usufono mo Faleata Sisifo.

**Tofa Lealailepule Rimoni Aiafi:** Ioe, malie lau Afioga i le Minisita, ua uma ona avatu lau talosaga faa-tolu, tagai lau Afioga, o oe foi le isi sui usufono lau Afioga o lea e afio i i, i Vaitele. E toeitiiti lava vaiaso uma e lavea ai taavale i Vaitele i 4 corners. O lea e avatu ai le talosaga faamolemole se i tagai ifo i ai i stop signs, aemaise faamama autafa. E moni e i ai isi aiga e le fiafia i ai, ae tatau ona fai se fuafuaga i ai, ona ua faatupulaia faalavelave i vaega ia o le atunuu. Ma le faaaloalo lava.

**SUI FOFOGA FETALAI:** E lagolagoina e le Nofoa le talosaga lea lau Afioga i le Minisita.

**Tofa Namulauulu Leota Sami Leota (Faasaleleaga Nu 2):** Lau Afioga se avanoa lava se tasi faamolemole.

**SUI FOFOGA FETALAI:** Se mataupu sa e lauga ai.

**Tofa Namulauulu Leota Sami Leota:** O lea lava lau Afioga.

**SUI FOFOGA FETALAI:** Ia tuu atu le avanoa i le sui usufono mamalu mo Faasaleleaga Nu 2.

**Tofa Namulauulu Leota Sami Leota:** Ia faafetai mo le avanoa lau Afioga i le Fofoga Fetalai. Faafetai i lau Afioga le Minisita. E matau atu o lea o le a seu i fanua lou sa. Ua logo lava i tino matagi lelei lau saunoaga i le po anapo aemaise foi i lenei taeao matagofie. O le upu lava a le tusi o se fiafia ina pese ia. E leaga o mataupu ia sa faapea ona lagalaga e lau lauga muamua i le Paeaiga leni. E faafetai o lea ua to lau pule. E leaga ua alu anapo o valaau mai si ou itumalo, aemaise si ou nuu o Tapueleele. E momoli le faafetai ia Papalii ma le Malo, o lea ua talia le latou talosaga, aemaise foi o le matou auala lea i Sapapalii, lea ua i lalo o le lisi o fuafuaga alualu mamao a lo tatou Malo. Ona o lea sa taua e lau Afioga le tulaga i le malaevaalele lea i Maota. O lea sa taua faapea o lea o le a i ai galuega faaleleia. E na o se tuualalo lava lau Afioga, aua o lau Afioga foi o le Minisita o Kamupani vaa. E i ai isi taimi e tai 2 aso o poloka le Kamupani vaa ona o tulaga i afa. Pe a fa i lau Afioga aemaise foi le Minisita o le tatou vaalele, i taimi ia, aua e tele ina poloka le vaa, ae omai i le malaevaalele. Ae le o avanoa lava se vaalele, na ona aumai ai nai tagata mai Savaii e tuli mai foi galuega, aemaise foi taimi a o faagasolo Fonotaga a le Palemene. E na ona taatia atu, pe afea e lau Afioga ma talatalanoa ai foi ma le Minisita o Vaalele mo le agai mai. Faafetai tele Papalii mo le folasaga matagofie.

**SUI FOFOGA FETALAI:** O lea ua maua atu le talosaga a Faasaleleaga Nu 2. Tulai mai lau Afioga i le Minisita.

**Susuga Hon PAPALIITELE NIKO LEE HANG:** Faafetai i lau Afioga Namulauulu mo le fautuaga. E taua le fautuaga lea, ona e sao ai le saunoaga, a afatia loa le vasa ma taofia faigamalaga a le vaa. E tatau loa ona galulue fesootai le kamupani vaa ma le kamupani vaalele, ina ia avanoa le vaalele, mo se auala mo femalagaiga i le mamalu o le atunuu o lo o alala ma papaaao i Salafai. Ae ua faamauina lau fautuaga, o la foi e faafogafoga mai ia le Pulega o le Kamupani vaa, aemaise foi o le Pulega o le Kamupani vaalele, se i manatua ifo le tulaga lea. A outou faafogoga o taofia alavaa, ona fai lea o se tou fesootaiga, ina ia faaauau le malaga a le vaalele ina faataunuina ai faigamalaga ia mo le mamalu o le atunuu i Salafai. Ae toe faamanatu atu lava le tulaga o le tatou Fonotaga, na faaiuiu lau lauga, ou tali uma atu i manaoga ma tuualalo a outou Afioga. Ae o lea la ua toe aliali mai tulaga ia o le toe lagalaga mai o mea. O le avanoa lena na tuu atu pe i ai ni mea na misi. Ae o le tele ia o tuualalo ma nei mea, ou te le iloa pe tatau ona ou tali atu i ai. Ae leaga ou te faaaloalo tele lava, e tatau pea ona ou tali atu. A o lalo o tatou Tulafono Tumau, a uma loa ona tali le Minisita ua leai ma nisi faauilavea, ua maea. A o nei mataupu e tulai mai, o mea fou, o mea faatoa saili e sui usufono ananafi maua, a ua leva ona pasi le taimi o le avanoa. Ua na o se tuualalo ma se fautuaga mo le agai i luma.

Ia faaauau mai i le Kamupani vaa, ua ou le iloa po o fea o gata ai le mea ua tele le faauilavea. O le isi galuega tele o le faalolotoina o le ava lea i Mulifanua. Ua maea, mo le puipuiga ma le saogalemu o le tatou vaa o le Lady Samoa III, ua amata ona papau le ava. O lea la ua faaleleia lea tulaga. O le faaleleia o moli taiala i Mulifanua ma Salelologa. O le faapipiina o moli faasino folau i uafu i Mulifanua ma Salelologa. O le suiina o le MV Samoa Express i le MV Samoa Express II, o lea e taunuu mai i le weekend le vaa lea. Mo le faamoemoega ina ia faatele nisi vaa e faaoga i femalagaiga a Tumua nei ma Pule i Salafai. O le vaa la lea e faamoemoe e taunuu mai i le faaiuga o lenei vaiaso, ia viia le Atua ua maua foi sia faamanuiaga mo i tatou. Ma o vaa uma nei, o tupe a le Kamupani vaa lea e faaoga ai, e le o ni tupe faameaalofa e pei o isi vaa ia e fesoasoani mai ai Iapani, i le Lady Naomi.

O galuega fuafua mo le 2021-2026 ua fuafuaina e le Kamupani vaa, o le fuaina ma vaevaeina le fanua lea i Mulifanua, le new reclamation, ua outou silafia. I le taimi nei, o le tele ia o le reclamation, le property lea, e tapena ai ni fuafuaga mamao mo le faaogaina i le fuafuaga lea e tapena nei e le Kamupani vaa. Faapipii nofoa taavale lau oloa mamafa i Mulifanua ma Salelologa ina ia fuaina le mamafa o loli ia e feaveaia uta mamafa. Ina ia talafeagai ma tulaga o le mamafa o uta ia e ave e tatou vaa, ina ia

saogalemu, ina ia aua ne i tupu mai se faalavelave. Ona o le mamafa o uta ia e feaveai e loli ia. O le suiina lea o le Lady Naomi, lea e faatupe e Iapani, o le faamoemoega ia maea ia Ianuari 2023. O le suiina o le Fotu o Samoa ia Tesema 2024. Ia faatino se suesuega faapitoa mo le toe faaleleia o uafu i Mulifanua ma Salelologa, o le faamoemoega e taunuu lea fuafuaga ia Tesema 2026.

O le upu moni lau Afioga i le Fofoga Fetalai, ua maua foi tala salatua i faatosina ia a le vaega lea o le FAST. O lea ua folafola, a tulai mai ua pau le pasese o vaa. Atonu e le sao lea tuuaiga, ae ia te au, e faigata ona fai lea tulaga. I le amataga o le Nofoaiga lenei 2016, sa talosagaina ai au e le Pulega ma le Komiti Faatonu, ua tatau ona sii pasese o vaa. O lau tuualalo i ai, e ui o lea ua laititi tatou tupe maua, ona o le tele o tupe alu i le faaleleiga o vaa, ua fai si matutua o vaa. O vaa uma ia ua i ai, ua ova i le tai 20 tausaga, ma e taugata. E le po se lilo i le maintenance, e fai lava si taugata. O lea la sa ou fautuaina, taofi ae se i faatali nisi vaa ia e tau ina fesoasoani i le tulaga lea o le meniteni, ona ua fai si matutua. Ma sa tatau ona siitia pasese i le taimi lea, ona o lau vaai atu foi i le cash flow ua fai si faaletonu ona o le tele o expenses i le tau faaleleia o tatou vaa ua fai si matutua, ae pei o le tuualalo lena i faasalalauga. Atonu se i tulai mai latou fai ia tulaga. A o le taimi lea ou te vaايا ai le kamupani vaa, e le mafai ona faia lea tulaga. E tatau foi ona tatou fua i tupe maua, pe gafatia ona faaaauu....pe a pau pasese o vaa.

**Susuga Hon Laauli Polataivao Leuatea:** Lau Afioga i le Fofoga Fetalai, leaga o lea e fai mai o le faaaloalo leaga o lea ua satia si o matou igoa o lea e talai nai mea ia i le matou savaliga faamolemole. Pe maua se avanoa.

**SUI FOFOGA FETALAI:** O le mea lea e leaga ai le afe fua i le pola motu i tua lau Afioga i le Minisita, o lea ua tulai mai. E le mafai la ona ou tuua, e tatau ona ave i ai se avanoa. Ae malie le sui usufono o lo o faauilavea, tulai mai ae ia faapuupuu.

**Susuga Hon Laauli Polataivao Leuatea:** Ia faafetai. E tasi ia ae foi e le o se pola e motu i tua lau Afioga i le Fofoga Fetalai, malie lou finagalo. O la e faafofoga mai Samoa, matou te le faia se talaiga faapea e taufaasese. O matou lava faiga faavae ma le matou faamalamalamaga ia Samoa, a aumai la outou faatuatuaga, o le mea lea matou te omai fai. O le sailiga o le tupe ma le mea e faatino ai, e faatoa matou faaalua i le atunuu i se taimi mulimuli. Ae le o se agaga faapea ua matou faasese. O le finagalo lava lea o le Minisita ma le Pulega i le taimi lenei. A o le matou faamalamalamaga ia Samoa, e le o se tala ole. Samoa ma lau faafofoga, o lea ua uma ona matou fai atu. Ua uma foi ona matou tapena, i le mea e faaagaga i ai le

tupe, e fai ai le pau lea. Ae malie lou finagalo e le o se pola e motu i tua lo matou manatu. O au nei o le taitai o le Vaega Faaupufai na momoli i le auala malamalama. O le ala lea lau Afioga ma le faaaloalo.

**SUI FOFOGA FETALAI:** Ua ou musu ou te faamalamalama le pola motu i tua. Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** O mea nei o folafolaga e fai i tua, e faavae lava i le mea e tasi. O le tusia i i, ma tauto i i, ae pepelo. E pepelo i luga o le Tusi Paia. O ai la se isi e toe talitonuina se upu i tua atu o le Maota lenei? Lau Afioga, e te pepelo loa i luga o le Tusi Paia, o le a la se isi pepelo e te le toe faia? Aemaise o lea e matau le atunuu atoa. O le mea lenei, tau fuafua, leaga e le valea uma le atunuu. E faamasino oe i au mea e fai i totonu o le Maota lenei. O le a se isi folafolaga e fai atu i tua, e oo lava i lau folafolaga na fai o tuu i luga o le Tusi Paia ae talapepelo le tauga o le igoa. E na o le sui usufono lava lea na faalua, ona faatauto talu mai ona faavae le Malo lenei i le 1962. O le mea la lea, malie ia lau susuga, soia le toe aumaia ni folafolaga i totonu. Leaga e leai lava se isi e toe talitonu ia te oe. O se isi folafolaga e fai i tua atu ae ua uma ona e folafola i luma i i, ma tusi lou igoa ae o lea e tuu lou lima i luga o le Tusi Paia. O ai la se isi e toe talitonu.

**SUI FOFOGA FETALAI:** Ia malie sui usufono o lo o tutulai mai, aumai le avanoa i le Nofoa se i avatu ai se faamaninoga o le mea lea, leaga o lea na e faasea i le Nofoa.

**Susuga Hon Laauli Polataivao Leuatea:** Malie Nafaitoa, malie lou finagalo o lea ou te talosaga atu, ua uma ananafi, ua maea foi na tea. O lou igoa atoa o Laaulialemalietoa, o ai e ona le Laauli? O Malietoa, o le atoaga lenei o le faamoemoe. O la e tapuai mai lo matou nuu.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, se i silasila la...

**Susuga Hon Laauli Polataivao Leuatea:** Se lau Afioga i le Palemia, se malie ia oe si ou tama. Ia malie ia lou finagalo.

**SUI FOFOGA FETALAI:** Ua toa-lua sui usufono mamalu e tutulai i le taimi e tasi. E le faapena le Fonotaga a le Maota lenei. E lelei ona ou faamanino atu le mea lea. Laauli e le tau avane ai se matou faamatalaga, e manino lava mea na e te tau saunoa i ai. O le faaogaina e le Nofoa o le

pola motu i tua, o le mea e le i tupu, o lea e talanoa i tua, o lea e tu i luma le Malo, o le uiga lea. E le amanaia la, se i fai pea lo outou finagalo a o lea e tauave e le Malo le fua i lenei taimi. Sa ou manatu o oe e loloto le tofa i le mea lea. E le tau aoaia e le matapia le manaia. O le tatou nonofo ai, o le tulaga foi i suafa, o la e manino faamaumauga. E le tau fai atua ai se faamatalaga. O le mea lea ou te musu ai, e fai atu le tala lea, i aafia ai se finagalo. A o lea lava e manino pepa i totonu o le Maota lenei, na o Laauli. E le tau fai atua se tala, o le mea lea, se tau fai foi ma ava mai i le Nofoa, o lea e ava atu le Nofoa. Ae o le uiga lena o le upu sa faaoga. E le i oo i le taimi e faaoga ai. Ma le faaaloalo. Tulai mai lau Afioga.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai, e puupuu lava si au fesili lea lau Afioga.

**SUI FOFOGA FETALAI:** O le a le mataupu lea e te tulai mai ai.

**Tofa Olo Fiti Afoa Vaai:** O le mataupu lava lea...

**SUI FOFOGA FETALAI:** O le taimi nei o lea e saunoa Minisita, seivagana ua agai i o. Afai e le i taua i lau saunoaga autu, malie le sui usufono mamalu.

**Tofa Olo Fiti Afoa Vaai:** Lau Afioga sa ou talanoa i le faiga faavae lea ua ou fesili sao atu lava i lau Afioga, aumai se faaiuga. O lea ua talanoaina le sao o igoa, o lau fesili lau Afioga i le Fofoga Fetalai. Sa e matauina, na faatautoina se Tapunuu i totonu o le Palemene lenei. O lea ua ou vaai atu i le suiga o le Tulafono lenei, leaga o Tulafono a le Malo. O lea ua faapea mai, o au o Tapunuu Niko Lee Hang. Lau Afioga, faasao le mea lea, e leai se Minisita e suafa ia Tapunuu...

**SUI FOFOGA FETALAI:** O lea ua maea ma ua faailoa foi i le Ofisa o Faiga Palota, ua aloaia. O le agaga lena.

**Tofa Olo Fiti Afoa Vaai:** Lau Afioga, e le i alu ai i le palota i le suafa lea. O lea e molimau ma faamauina i le Palemene.

**SUI FOFOGA FETALAI:** Se i alaala mai lalo le sui usufono.

**Susuga Hon PAPALIITELE NIKO LEE HANG:** O nei saunoaga faaoloataua. O la e manino lelei i le sui usufono, ou te le i faaogaina le igoa lea Tapunuu, se i fai le faiga palota.



**Tofa Olo Fiti Afoa Vaai:** Lau Afioga o lea e i i, le suiga o le suiga o le Tulafono. A lea, o au o Tapunuu Niko Lee Hang.

**Susuga Hon PAPALIITELE NIKO LEE HANG:** Ae le i faia le palota e faamamalu ai. Ou te le iloa po o e malamalama i nei mea. O lea ou te talitonu au ia, o lea ou te alu i lou Papalii i le Fono lenei.

**Tofa Olo Fiti Afoa Vaai:** Lau Afioga ou te tatalo atu, e le aloaia le Tulafono lea e saina, toe ave i tua le Tulafono lea.

**SUI FOFOGA FETALAI:** Malie le sui usufono, alaala mai lalo. Tuu atu le avanoa i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, se ua fai si soli Fono o le sui usufono lea, se i taatia mai o lea e saunoa le Minisita.

**SUI FOFOGA FETALAI:** Ou te le toe faatagaina le fesili lea na tuuina mai Olo. O lea tatou te Paeaiga Lona XVI. E masalo o lea e manino le saunoaga a le Minisita. O le suafa lea e te taua, e faatoa faaoga i le taimi o le faiga palota i le 2021 pe a maea. Malie sui usufono o lea ua ou fai atu, utagia se fautuaga a le Nofoa. Tapa lau Afioga i le Minisita e saunoa.

**Susuga Hon PAPALIITELE NIKO LEE HANG:** Ia e le tio foi i le Afioga i le sui usufono. Ai ua fiu e sue se auala e aveese ai au. O le upu a le Tusi, a afio le Atua ma oe, e fiu le fili e taumafai mai ni ana mailei e auala mai i tagata faapenei. E fiu lava e malo lava le Atua. E moni lava le alofa o le Atua i ona tagata. A o le taumafaiga lea o le alii o le lalolagi e faaleaga tatou. E manatua foi lau Afioga, o tofiga nei o tofiga mai le Atua, e pei foi ona i ai outou. A o outou folafolaga ia e fai, o le a outou o mai e sui le Malo, ia faamalulu atu. O le tofiga o le tofiga mai le Atua, o le valaauina a le Atua. E na o le Atua foi, e mafai ona toe aveeseina taitai...

**Tofa Olo Fiti Afoa Vaai:** Lau Afioga i le Fofoga Fetalai, e le o matou e faia le folafolaga lea. O le atunuu atoa lava o lea e faia le folafolaga lea, ia suia le Faigamalo, ae le o matou.

**Susuga Hon PAPALIITELE NIKO LEE HANG:** Vaai i le lē mafaufau o lea foi ua tulai mai i luga, e le i avatua se faatagaga.

**SUI FOFOGA FETALAI:** Ia malie le sui usufono e le i tuu atua e au se avanoa ia te oe. O le a ova lou soli Fono. Olo, faatoa ou taua lava lea o lou

suafa. E faatoa taua lava lea e le Nofoa o lou suafa. O le a ova lou soli Fono, fesili mai i le Nofoa ona avatu lea o se faatagaga. Saunoa lau Afioga i le Minisita.

**Susuga Hon PAPALIITELE NIKO LEE HANG:** E faasao le saunoaga lea, ou te le i fai atu o Olo o se tiapolo. O le alii o le lalolagi, e faaaoga auauna lelei ia. Ou te le iloa pe o lelei lava pe ua leaga i lenei taimi. A o lau fautuaga lena i le sui usufono lea e saunoa. Se e le i aloaia le suafa Tapunuu, se i uma le faiga palota.

**SUI FOFOGA FETALAI:** Malie lau Afioga i le Minisita, aua le faoa i le ta lou finagalo. Aua ne i popona le toa, alo pea i lau saunoaga, faamaea ona tatou oo lea i nisi faamatalaga. Aua e te amanaia fua, o lea ua fai le faaiuga a le Nofoa, i le saunoaga a le sui usufono mamalu.

**Susuga Hon PAPALIITELE NIKO LEE HANG:** Faamalulu atu i lau Afioga i le Fofoga Fetalai, o lea o le a oo lava i le 3 po 3 ao o fai lau lauga i le tele o faauilavea. E pau lava le faauilavea ou te talia, na o le Afioga i le Palemia. Aua e fesoasoani mai mea ia ou te lauga atu ai, aua e tele lona silafia, ia tatou uma lava. O tatou e laiti, faatoa tatou o mai ananafi. A o le Afioga i le Taitai, ua loa i totonu o le Palemene, e malamalama i so o se ituaiga Tulafono, e malamalama ia outou campaign ia e fai, tou te faasagatau mai e faatoilalo le Malo. Ae faamalie atu, e le aoaia foi e Laupua Tamafaiga. O taitai o le atunuu, taitai o le Malo e tofia mai e le Atua. Tou te fiu e fai ni a outou galuega e faatoilalo ai le Faigamalo, a finagalo lava le Atua e toilalo, e toilalo. E matou te talia foi ma le faafetai, leaga matou te mulimulitai lava i Afioga a le Atua. A o le tou galuega lea e fai, faatoilalo le HRPP, e le o sa outou galuega lena. Tatalo, tatalo ma le agaga salamo, e faatoilalo le HRPP. Ae leaga le tatalo ae o faaleaga le Malo, ia e leai lava ma se tou mea e maua.

Lau Afioga i le Fofoga Fetalai, o le a faauma atu. E lagona lava le faanoanoa i ni lafoga soona fai ma taufaaleaga tagata. Ona e le moni tuuaiga ia soona fai mai le aiga i le Afioga Fiamē ma le Afioga ia Laauli, o le Faatuatua i le Atua Samoa ua tasi, FAST. Ma i latou roadshow o lo o tuuaia ai uma Minisita o le Kapeneta e fai a latou konekarate fai auala. Lau Afioga e faanoanoa lava i lea tulaga, a tau i le upu papalagi, o le defamation of character. O le tuualalo i lau Afioga pe i ai ni ai o lea tulaga aumai ni faamaoniga. O lea ou te malamalama lelei i konekarate lea e resitala, e leai ma se Minisita o fai sana konekarate fai auala. Ou te le iloa la po o fea e o mai ma nei tuuaiga matuia, faaleaga tagata deformation of... o lea ou te tatalo atu ai i lau Afioga, pe mafai ona faatonu taitai o le vaega lea, e aumai ni faamaoniga o folagasaga ia. Aua e le mama ia matou, o la ua faapea le atunuu, o Minisita uma la, e corrupt uma nei Minisita. O

le tulaga la e fai, e tetee matou, leaga o lea e fai la matou galuega i le loto faamaonia. Ma le talitonuga o lea e fesoasoani mai le Atua, e faataunuu ia tofi na valaauina ai matou.

Lau Afioga i le Fofoga Fetalai, ou te tuualalo atu foi i lau Afioga Fiamē ma Laauli, soia le taumafai e faasalalau le tou faamoemoe tou te o mai e sui le Malo. E na o se faamanatu atu i le tou vaivaiga, o le Faigamalo o lo o tulai mai nei. O lo o taitai e le Afioga i le Palemia, le Susuga Tuilaepa Dr. Sailele Malielegaoi, ou te talitonu o se tofiga ma se valaauina mai le Atua Silisiliese. Ma na o le Atua lava e ona tofiga i taitai o le atunuu, e toe aveeseina i latou e tusa ma Lona finagalo. Ae le o se tatou manaoga. O sau fautuaga mo le tou aiga taumafai, e sili ona faaauau la outou roadshow ma sui la outou tauloto, tou te fia omai e faamalosi se Vaega Faaupufai malosi e agaia le Malo. Strong Opposition, ona e tumau lava lou talitonuga, na o le Atua Silisili Ese e mafai ona Ia toe suia se taitai ma se Faigamalo sa ia tofia ma valaauina. O le fesili, o a ni mea leaga a lenē Faigamalo ua fai? O fia aai lo tatou atunuu? o fia tausasami? o fia taumamafa? o mamai tatou i le faamai? O le isi galuega taua lea e fai le puipuiga a le Malo, e faataua. Ua oo lava i pisinisi ua tapunipuni, ona o le naunautaiga ia puipua le atunuu mai faamai. E tele le aafiaga o le tatou tamaoaiga i le tulaga lea ua fai e le Malo, ae ua sacrifices uma nei mea e le Malo, ona o le puipuiga. O le alofa i le mamalu o le atunuu, puipui mai i le faamai oti lea e aafia ai tatou. Lau Afioga i le Fofoga Fetalai, o tatou uma lava o le fanau a le Atua. Ua malamalama lelei ia tatou tofiga mai le Atua. O se taumafaiga a le tagata i luma o le silafaga a le Atua, tatou Tapaau i le lagi e sui se Faigamalo, na tofia e le Atua...

Lau Afioga i le Fofoga Fetalai, e le aoaia e le matapia le manaia. E na o le alofa atu faale-uso ia Keriso. A o lou lava talitonuga, e fiu lava le alii o le lalolagi e faaoga nisi o lana fanau, e talepe nisi o ana fuafuaga ma tofiga paia divine appointments e auala mai i ana tofiga, aemaise ana faamanuiaga mo Taitai sa ia tofia ona e faavae lo tatou atunuu aemaise le tatou Faigamalo i le Atua.

Lau Afioga o la le Tusi – Roma 8: 31; “Afai ua au ma i tatou le Atua, o ai se faasagatau mai ia te i tatou? Amene. If God is for us, who can be against us?”

Ona faaiu atu lea o se lauga lau Afioga...

**Afioga Hon Lopao Natanielu Mua (Minisita mo Faatoaga ma Faigafaiva):** Lau Afioga i le Fofoga Fetalai meamanu e le i...

**SUI FOFOGA FETALAI:** Ia, se i tuu atu le avanoa i lau Afioga i le Minisita mo Faatoaga ma Faigafaiva.

**Afioga Hon Lopaoo Natanielu Mua:** Ou te fia tulai atu ma le faaaloalo, o lea sa faatu le lafo e le Afioga i le Minisita o Galuega e fia aumai se faamaoniga o tuuaiga ia e fai konekarate uma Minisita o le Kapeneta. Ou te faaluaina le lafo lau Afioga. Ma le faaaloalo.

**SUI FOFOGA FETALAI:** Malie lau Afioga i le Minisita, o lea e tau faamaea le saunoaga a le Minisita, ona avatu ai foi lea o se tali a le Nofoa. O lea papale mai pea, e maea loa, ona avatu foi lea o se faamatalaga a le Nofoa e uiga i le talosaga ua tuuina mai.

**Susuga Hon PAPALIITELE NIKO LEE HANG:** Faafetai i lau Afioga i le Fofoga Fetalai. Sa avatu lava lau tuualalo i se taimi ua tuanai, na o le faauilavea lava a le Afioga i le Palemia ou te toe tulai atu i ai, ae manaia foi le faalua mai e ui e le o se lafo, ae se i faatu atu i se taimi le lafo. Ae tatalo atu lava toetiiti lava uma. Ae a tulai mai pea ni faauilavea, ia e oo lava i ai lau faamatalaga e 3 po 3 ao o lauga le Iuli mai Falefa.

Lau Afioga, o lea faatoa logo mai au e le Ofisa Sili o Pulega ma le Matagaluega ua maliu le tuua o lau Minisita Lagolago, le Susuga i le Seiuli o le Alo o le Malietoa. O lea la e momoli atu ai faamaisega i lau Susuga pe a o e afio mai Seiuli, ia maua pea e lau Afioga ma le aiga le faamafanafanaga mai le Atua ina ua oo mai foi le ao pogisa i lau Afioga ma lou aiga ona o le toesea o le Tama o le aiga i le valaau paia a le Atua. O lea foi e matau atu ua tumutumu mai le la pito i lau Pulega o le Fai Auala, LTA, ou te iloa po o i ai se tala fiafia, ae ou te le faaalua atu la. Ae se i tatou talanoa i se taimi po o le a le mea ua outou... na outou omai e tapuai le lauga a le tou Minisita. Ia faafetai, viia le Alii. Ae momoli atu foi lau faamalo i la outou galuega, e ese le taua o le tou galuega, o le faamoemoega o le atunuu. Ia lelei tatou auala, fai faalelei auala, faalamolemole lelei auala, e tele auala la ua ou vaai i ai ua tele ina omoomo, se i o e vaai. O lau galuega tele lea e fai i aso uma ou te alu e asiasi i tua e vaai ma lipoti atu, aemaise le matou Komiti Faufautua. O le latou foi galuega lea e fai i masina uma ma lipoti mai, e tau atu lava. Ae aumai lava tala, e leai lava ni mea o faia. Faamolemole, o e fai a tatou galuega pei ona tofia ai outou.

Ia masalo lau Afioga, ua misi ia te au le Faalapotopotoga o Vaa lea le SSS, lea foi ua toe misi foi. Ae faamalie atu, o le taua ia o le isi foi Faalapotopotoga lea, ona e tele foi le latou sao i le atiaaina o alo ma fanau o lo o faafaigaluegaina i vaa ia cruise ships ia ma vaa lau oloa mai le kamupani lea a MSC. Mo le update lau Afioga i le Fofoga Fetalai, o lo o faaauau pea le mafutaga lea a le tatou kamupani o le SSS ia ma le kamupani lea o le MSC i o i Europa mo le faaogaina o alo ma fanau e faaauvaa vaa meli ia ma vaa lau oloa i kamupani tetele ia i o i Europa. O lea foi ua i ai le fuafuaga, ua uma ona tapena le isi vaega, ae ona o le tulaga

o le faamai, lea ua tau taofiofi mai ai le o atu. Ae tatala loa, ia ona toe malaga foi lea o alii seila ia, alo ma fanau a le tatou atunuu e o e fesoasoani foi i lea kamupani. Ma o le tele ia o le faamanuiaga e fesoasoani i le tatou tamaoaga i alagatupe ia e maua e alo ma fanau ia o lo o faigaluega i kamupnai vaa lea i Europa.

E momoli atu ai le faamalo ma le faafetai i lau Afioga i le alii Pule ona o le tulaga o lou galue pea, e ui ua tele mea o challenges i lenei vaitau ona o le faamai ma ua taofia tatou borders foi nei e mafai ai ona femalagaai atu alo ma fanau ina ia faataunuu le latou galuega. Ua uma ona faamaonia mai e le kamupani le isi auvaa lea ua tapena atu. E pei ona ou fai atu, o le faamai ma tulaga o le taofiofia o tatou borders i isi atunuu, o lea ua faatuai ai. Ae tau lava lau o le faamoemoe pe a tatala loa tatou borders mo le femalagaai atu i atunuu i fafo.

Lau Afioga, masalo o lea ua maea uma mea sa... ae avea ia lenei itula e momoli atu ai le faafetai i lau Afioga, malo le faatoatoa malo le onosai. E tele lau galuega i le tau faafoeina o le tatou Fonotaga ona o le lē usitai o le tele o sui usufono. Ae faamolemole, faaoga loa lou lima malosai a le nofo i lalo se faipule e le usitaia au Tulafono Tumau, ia faasino le auala e alu i fafo. O lau fautuaga lena, ae pule lava lau Afioga, leaga e lava le tofa, e lava foi le faautautaga i lau Afioga e fai ai le mea lelei ma le mea faalelelei. Ae ia manuia le tatou Fono i lenei aso. Faafetai mo lou avanoa.

**SUI FOFOGA FETALAI:** Sala ina siisii le tai i lenei taeao i le Maota lenei i le tofa sasaa a sui usufono filifilia o le Maota, aua o lau Afioga o lo o feagai ma le poutu o galuega tetele ma atinae a le Malo. O se vaivaiga lea o le Nofoa. Ae i ai le lagona, e lelei ona ou oo muamua atu i le mea lea na saunoa i ai lau Afioga.

I faamaumauga a le Maota, e le o maua ai sa faataoto se saunoaga faapea a le sui usufono mamalu o lo o faasaga i ai le talosaga e uiga i mataupu ia, e tusa o tatou Tulafono Tumau. O le ala foi lea o le le tuuina atu o se fesili ina ua faalua le lafo, ona e i ai itu e vaavaai i ai le Nofoa. O lona uiga o lea e maua, o faasalalauga i tua atu o le Maota pe afai o le sao lea. O lo o i ai foi la Tulafono e aiaia ai vaega na. A o le agaga lava o le tatou Maota ma le tulaga o le aumaia o faamaoniga i totonu o le Maota lenei, o saunoaga na faataoto i le Laulau a Fono e faafofoga i ai le Maota. O le mea lea, e i ai le lagona, e i ai tulaga e ao ona faatino i le mataupu lea na saunoa i ai le Afioga i le Minisita. Malie le Minisita o Faatoaga, o le ala lea o le le tuuina atu e le Nofoa o se fesili, ona o lo o vaavaai i tulaga ia. O lea foi ua maua, ia, o le agaga lena.

O le mea lea, ia, e faamalulu atu ai i le agaga o le tulaga lea, pei ona e taua ai le defamation of character, e i ai auala e faatino ai pe afai o tua atu o le Maota sa faatino ai. O le Maota Fono o le Palemene, na o mea moni ma le faamaoni na tuuina i luga o le laulau ma faafofoga i ai sui usufono

mamalu uma ma faamauina i faamaumauga a le Maota. O le agaga lea ma le faaaloalo. Ou te manatu o lea ua manino auofala i le mea lea.

E i ai le lagona o lea ua lologo le faiva o ulula, ma ua taliga i tuliau le faafofoga a le atunuu aemaise le Maota lenei i le saunoaga matagofie a lau Afioga i le Minisita o Galuega, Felauaiga ma Atinae Tetele a le Malo. E momoli atu ai le faafetai tele ma le agaga faamalo i lau Afioga, e faapea foi Matagaluega o lo o i lalo o le vaavaaiga a lau Afioga i le tulaga o le maoae, le tulaga o le atinae o le atunuu, talu mai lava lenei Nofoaiga i le 2016 seia aulia le 2020. O le mea lea, ia, o lo o soifua le Atua, o Ia e silasila ona fofoga alofa i le afu pau ma le mataua ua pau i le eleele, o auauna tauaogaina aua se manuia o Samoa ma ona tagata.

E momoli le faamalo ma le faafetai i lau Afioga, malo galulue, ua malo foi le faatoatoa. Ua faafofoga le itumalo i lau saunoaga, amuia le itumalo o i ai se toa, mau pea le toovae aua le tauaveina o tiute ma faiva ua valaauina ai lau Afioga. Tau ia ina ia alofagia e le Atua filifiliga a le atunuu pei ona saunoa i ai lau Afioga, ia taulu taulu ae to manu, e faia pea le finagalo o le Atua ae le o tatou loto.

Ia, o se faamatalaga lea a le Nofoa. Le paia e foi o le Maota, o le a foi sa outou faafofoga, e faapena taga o le Fonousu a le atunuu, e tetele a pesega ae matua lava i le oo. Ae o le talosaga a le Nofoa, tatou galulue faatasi. E malu le Nofoa i a outou Afioga. O la matou tatalo lea, ia i ai le agalelei o le Atua i le Fonotaga o lenei aso. Ia, o lea ua oo mai le faasologa...

Tulai mai lau Afioga i le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e i ai si mataupu lea ou te fia talanoa i ai a o le i amata le saunoaga a le Minisita o Faatoaga.

A matau mai, o lea faatoa 4 Miinsita, e le i afa le Kapeneta nei, ona totoe ai lea o le toa-ono la e nonofo mai o, ona faatoa faaiu mai ai lea ia te au, aua e le i faia lau lauga. Ae o le mea lea ou te fia talanoa atu ai, a matau mai i le faasolgoa o saunoaga, ua ese le mea lea ua agai i ai saunoaga a Minisita, o lea ua matua oooo lava i le tafue saunoaga a Minisita, e matua agai i Matagaluega eseese uma se i faafogafoga le atunuu i galuega o lo o faatino e latou i le tele o matafaioi o lea Matagaluega ma lea Matagaluega ma lea Matagaluega, ia ma lea foi Ofisa o lo o feagai ma i latou. Ua ala ona ou taua le tulaga lea, ona ua ese foi le lalolagi lea ua tatou i ai. O lea ua tali atu i le atoatoa Minisita, o le toe Fono lenei, se i faafogafoga Samoa i le loloto ma le lavelave ma le gaosa e mafua ai ona tele le taimi o Minisita e alu i o latou Ofisa, ae o lo o tautuaina e i latou ua togia i tiute eseese, ina ia malamalama lelei le atunuu i le tele o galuega o lo o faafeagai ma le Malo. Ua ese la le Fono lenei. O le mea lea, usi pea le faafogafoga, usi pea le faafogafoga. O le a faafogafoga le atunuu ae o le a matua talatalapipi uma

tiute o lo o fai, e ese ai ma tatou Fonotaga na fai muamua, sa tali i le fesili, tali tonu lava i le fesili. O le taimi lenei, o le a tali fesili ma ona tua atu, ina ia malamalama ai i le galuega, e le na o le tali fesili, ae tele galuega ia o lo o faafeagai ma le Kapeneta. Afai foi la ua lelavava. Ia, matou te faamalulu atu, leaga o le Kapeneta lenei ua leva ona koleni mo le aso lenei, taimi lenei. Ua leva ona koleni ma tapena. O le ala foi lena sa ou tutulai atu ai ma ou talanoa atu i le tatou Maota, ua leva ona fia tutulai atu le Kapeneta, leaga o le Kapeneta galue, o le Kapeneta galue. Leaga o lea ua faasalalau i nusipepa, e leai se aoga o le Kapeneta, e leai se aoga o Ofisa Sili o Pulega o Matagaluega. O lea la o le a fola atu loa upu e pei ona masani ai le isi vaega lea, fola le fala, fola le fala. O lea la ua fola le fala, ma lau tatalo, o le mea e igoa o le fola o le fala, ia oooo lava i ooooga le talanoa a le Minisita i vaega uma lava o lo o gafa ma ia. O lea ua matau i le Minisita o Galuega, i le anoano o vaega eseese o le tafa eseese o lo o i lalo o lana vaaiga, e faapena uma lava Minisita ia o lo o totoe.

Lau Afioga i le Fofoga Fetalai, onosai mai, usi pea le faafogafoga, ua sau le afi i i le Kapeneta, ua uma ona tou siva, o lea la ua siva, ua oo mai i le aso e siva ai le Kapeneta. A alu alu foi o le a tatou le toe momoe, alu faasoloatoa i le 24 itula, o le mea lena o le a tatou alu ai. Ae onosai mai.

**SUI FOFOGA FETALAI:** Malo saunoa i lau Afioga. Ia, e lelei foi le toe faamanatu atu ai e le Nofoa a tatou Tulafono Tumau, o saunoaga a Minisita, malie sui usufono mamalu, o tatou Tulafono Tumau e le toe faatagaina le faauilavea i ni manatu fou e toe lagalaga i le tatala ai o le taafi e lauga a Minisita. E atagia ai le sui usufono e fia faauilavea e le i lelei ona tapena lana lauga mo mea ia aua le atinae o lona itumalo. Afai e toe tulai mai, o le a faasao atu loa e le Nofoa le tulaga o le vaivai ma le tulaga o le lelei ona tapena i lana lauga, ae ua toe tupu manatu foi ona o le faamaninoga e pei ona saunoa i ai le Taitai o le Malo, e le gata i le tali atu i mataupu na outou saunoa i ai, a o lea o le a talatala atu i tua. O le mea la lea e manatu ai, o tatou Tulafono Tumau, e tataua ona usitaia. Ma le faaaloalo.

Ia, ou te tapa ma le faaaloalo lau Afioga i le Minisita mo Faatoaga ma Faigafaiva e te tulai mai mo lau saunoaga i lenei aso.

**Tofa Hon LOPAOO NATANIELU MUA:** Faafetai i lau Afioga i le Fofoga Fetalai. E muamua lava ona ou faafeiloai atu i lenei taeao fou i lau Afioga i le Fofoga Fetalai. Malo le soifua malo foi le faapalepale i lenei taeao i le feagai ai ma luitau o le galuega i ou faiva o le Fofoga Fetalai o le Maota.

Ae se i muamua ona ou faafeiloai atu i le tatou Maota, e le gata i lea o le tapuaiga a Le Ao Mamalu o le tatou Malo. E faafeiloai atu i lau Afioga i le Tuiaana lau Afioga Tuimalealiifano Vaaletoa Sualauvi le II ma lau

Masiofo. E faafeiloai atu foi i lau Afioga i le Sui Ao, lau Afioga Le Mamea Ropati Mualia faapea foi le faletua mo la outou tapuaiga, a o alofaiva le Palemene a Samoa i ana Fonotaga i lenei aso.

Ae le i laaloa se tala, na ona ou fia avatu lava se faamaisega i le afioga i le faletua o le afioga i le Taulagi le Afioga ia Vaafusuaga Toleafoa Ken Poutoa, o le sa avea ma sui o le Maota o le itumalo faaalaalafaga o Lefaga ma Faleaseela. E le galo le uso nei, e fai si mafana o si a ma mafutaga ma le Afioga i le faipule. O le tatalo, ia maua pea le mafanafana e le tina ia Vaelaa ma si o la alo ia Winnie ae tatalo foi i le Atua ia faapea ona maua sou nofoaga i le lagi ma e faatalitali mai ai po o ai o le a pito atu ia oe. Ae manuia le faigamalaga, ia faapea foi ona faamaise le Atua i le aiga faanoanoa o lo o feagai ma le ao pogisa ona o le amia o le tatou uso. E faapena foi se moomooga mo le itumalo o Lefaga ma Faleaseela, ia faapea foi aiga na lua.

E faatalofa atu foi i le Palemene mamalu i lenei Itu o le Malu i Afioga i Taitaifono o Komiti Faa-Palemene a le tatou Malo faapea foi sui usufono mamalu o le Palemene. Ia, lenei Itu o le Malu i le matou Itu nei i le Afioga i le Palemia o le Taitai o le Maota faapea foi le Kapeneta, Minisita Lagolago. E fia faaleo foi se faatalofa i le paia o le Faamasinoga, i le afio o le Faamasino Sili o le Faamasinoga maualuga, le afifio foi o alii ma tamaitai Faamasino. E faapea foi le afio o le Afioga i le Peresetene o le Faamasinoga o Fanua ma Suafa ma Faamasino Samoa o le Faamasinoga.

E faatalofa foi i le Matagaluega, le Afioga i le Tamaitai Ofisa Sili o Pulega faapea foi le Matagaluega atoa. Ia, e le gata i lea o le fia faatalofa atu i le paia ma le mamalu i le tatou Pulega, i le afifio o afioga i tupu ma ee, o faletua ma tausī, saoa ma le malosī o le tatou atunuu o lo o faapea ona tatou mafuta i le Fonotaga i lenei aso, Ofisa Sili o Pulega o Matagaluega faapea foi Faalapotopotoga Tumaoti a le Malo. Malo fai o le faiva. E faatalofa atu i lo outou paia ma lo outou mamalu.

E fia faatalofa atu foi i lau susuga i le Failautusi o le Fono ma le Sui Failautusi faapea le tatou Matagaluega i ona vaega eseese. O au ia o taeao uma lava pei ta te fiafia e usu mai i le taeao, pati le matou ava ma nai tina la e i tua i le kofe faapea foi nai alii. Malo lava le laumata fiafia, e muliga lava ni oli a o ni foli, ae tatou te sagisagi fiafia i taeao uma i le faasoā ae le gata i lea o le auaunaga i so o se vaega i le tausīa o le tatou Palemene nei i aso uma e Fono ai Samoa.

E faapena foi ona fia faatalofa atu i le paia o le afaigaluega a le Atua, Taitai o Ekalesia ma le afaigaluega a le Atua o lo o faapea ona faafalelemalu ma faafaletuluia i so o se afioaga o le tatou atunuu, aua le tauasuina o le vai o le ola, aua foi le fesoasoani ma lagolagosua i le pulega a alii ma faipule o nuu ma afioaga taitasi. Malo lava le tatalo, faafetai foi i la outou tapuaiga i faiva o le Maota nei.



E manatua foi Afia i si ona vao aua o tatou uso i le motu i Sasae. Le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, ae a le afio o le Laau na Amotasi, Faatui ma Auvaa o Tootoo, Faleula tau aitu ma Faleula tau tagata ma upu ia te oe le Manuatele. Talofa, talofa lava.

O paia na ma mamalu o le tatou atunuu, faapea foi o tatou uso i Sasae. O paia faale-Malo ma paia faale-atunuu, i le afio o Tama ma Aiga, Aiga ma Tama, le Usoga a Pule ma Tumua, Aiga i le Tai ma le Vaa o Fonoti.

E faatalofa atu i le paia maualuga o le tatou atunuu i la outou tapuaiga, i la outou tatalo, i la outou fautua ma le lagolagosua i galuega a le Maota nei, aemaise le Faigamalo o lo o faapea ona faatautaia le sa o Samoa.

I se taimi ona ou oo atu lea i si ou itumalo, ae se i muamua ona ou taia le vaiafei ma sausau i le moana aua le ala ma le mafuaaga o le tulai i lenei aso ma lenei taeao. Ua maea ona soliateda le malama seia tau fono le la ma Tapuitema. Ae le vaea le falaooto i fisaga o le afiafi, lele ua susufi, ae a se ta malosi faafou i le tino ma le agaga? O lea foi ua toa i faga le tai o Atoa, aua o lea ua uma ona toto le laau i le tuaoi na saunia e lau Afioga i le Fofoga Fetalai le faafetai ma le faamua i lo tatou Atua, le Atua le Tama, le Atua le Alo ma le Atua le Agaga Paia. E manatu ua logomalu le ologa i falematua, aua o lele ua faliu le malama sa taifolau, ae faatai le leo se i faalauatea so tatou taeao fesilafai. O moomooga e le mavae, o le olioli e le faoa, aua le pule faasoa a lo tatou Tapaau i le lagi i lo outou soifua ma so matou ola, tatou te talameafaasolo ai i aga o le tatou feau ma le tatou galuega i lenei taeao.

Se i fai se leo e faailo lupe o le seuga ma faaali se manatu ma se taofi, aua o Samoa ua potopoto ma Samoa ua faafogafoga mai i le faatamasoaliiiga a le Matagaluega o Faatoaga ma Faigafaiva, faapea le fale suesue o le tatou Malo i Nafanua i le Paeaiga Lona XVI faa-Palemene talu mai ona Tutoatasi le tatou atunuu. O le mea moni lau Afioga i le Fofoga Fetalai, e le i faigofie le faigamalaga mai le 1960 e oo mai i le taimi nei, ua lalago mai tiasa le toatele o matua ma le atunuu sa latou asaina le vaofilifili, paepae i le ala o le soifua ma le ola o tagata Samoa i pulega na faafoeina lava e Samoa mo Samoa. Sa lutia i vasa ma feagai ma luitau faigata si o tatou atunuu. O le upufai i lou itumalo, sa lutia i puava a o lenei ua mapu i Fagalele le tatou sa i le faatautaiga ma le faafoe e Samoa mo Samoa lava, faatasi ai ma le fesoasoani mai a tatou paaga mai fafo, ae faapena le faatonu folau a lo tatou Tama o i le lagi ua mafai ai ona tatou taunuu i le faaiuga o lenei Paeaiga Lona XVI a le Palemene o Samoa, ua tepa i ula ua tago i ula ua sapaapaia o manuia o le seuga aua ua atoa i'a i liu o vaa. Ou te fia faaogaina se upu a se tasi o lauga a se tasi o Taitai o Pakisitana i le fono a faapotopotoga o tupe o atinae o Faatoaga po o le IFAD i le vaiaso na tea nei, na faapea ai le faa-Peretania, "Our destinies are inter-twined." O tatou taunuuga ma faamoemoega e felavasai ma fesootai. O le mea moni

lau Afioga i le Fofoga Fetalai, po o le a lou poto po o le a foi lou vaivai, pe e te mauoa pe e te mativa, pe e te nofo i se fale tioata pe e te nofo foi i se faleoo, pe e te soifua maloloina pe e te mai, o le mea moni, o le tatou ala i malo e felavasai. Our destinies are inter-twined e pei o le ietoga lona felavasai.

**SUI FOFOGA FETALAI:** Ua ou vaelupeina le saunoaga matagofie, o lea lava sa tau talitali le Nofoa a o fofola le fala, aua le fofoga tapuai mai ma le silasila maimoa mai a le atunuu aemaise Le Ao mamalu o le Malo ma le Sui o le Fono o Sui Tofia e pei ona e saunoa i ai. Aepeitai ona o tulaga o le tatou galuega. O lea ua tatou taunuu mai, i le taimi o le tatou malologa masani o le taeao.

Ma ou te faasilasila atu, e faataatiaese Galuega a le Maota mo ana galuega masani mo le 15 minute.

*Na faataatiaese Taulumaga a le Fono Aoaofa Faitulafono mo lana malologa masani i le itula 10:47 i le taeao ma le toe faaauau i le itula e 11:26 i le taeao*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.*

**SUI FOFOGA FETALAI:** Ou te faasilasila atu ua toe amatalia nei Taulumaga o le Fono Aoaofa Faitulafono. E i ai le talitonuga ua maua foi se faasiligamalosi i le paia o le Palemene, e tusa o le tatou malologa e pei ona tatou i ai.

E faataatiaese Galuega a le Maota, o lo o saunoa le Afioga i le Minisita o Faatoaga ma Faigafaiva. O lea ou te tapa ma le faaaloalo lau Afioga i le Minisita, tulai mai e faaauau lau saunoaga.

**Tofa Hon LOPAOO NATANIELU MUA:** Faafetai tele i lau Afioga i le Fofoga Fetalai, ou te manatu ua sao i alo le faamalosiगतिनो i lenei ituaso. Ua maua le malosi faafouina. Ae po o le a lava le malosi e maua i mea tausami, e le tutusa lava ma le malosi e maua mai i le Agaga o le Atua. E faapea ona fesoasoani e faamalosiau, aua e le taua le manava, ae taua le loto.

Ae ou te manatu e fai le tatou malologa, ua amata ona ou talanoa atu i nisi o faiga faavae o lo o fau ai ma fuafua ai, ia taumafaiga a le Matagaluega o Faatoaga ma Faiga Faiva ma le falesuesue o le SROS. O le manatu maualuga o le galulue faatasi o Matagaluega ma le au faifaatoaga ma le au

tautai a Samoa. O Matagaluega uma a lo tatou Malo, o lo o saofaga i le taumafaiga o le atinae o tatou faatoaga ma Kamupani tumaoti faapea foi le Private Sector, ia i latou o lo o faafoea kamupani. E maua ai le malamalamaaga, e mafai ai ona fau tele lo tatou sa, aua le sailia o ni manuia se tele o le tatou atunuu. O le galuega foi a le Kapeneta e pei ona i ai ma le tapenaga o anavatau, e faamoemoe i le galulue faatasi a Matagaluega a le Malo, e i ai ma le Matagaluega o Faatoaga ma le SROS, faatasi foi ma i latou le au faifaatoaga. Aua e le mafai, le mafai ona o na o le Matagaluega, pe o foi na o le au faifaatoaga. Aua e le mafai ona fetalai o latou mafaufau pe a faapea o le faiga lea. O le ala lena, lau Afioga i le Fofoga Fetalai, faatasi ai ma le faapiipii mai o anavatau taua lava o lo ua uma ona faatulagaina e le Malo Aufaatasi. Ina ia fai ma taiala o faamoemoega o atunuu taitasi e pei o Samoa foi. E pei o le avanatau ia lava mea taumafa, elimination of hunger. E ui i le tatou atunuu, e moni lava e tele le pisa, fai mai lea ua i ai tagata ua faatau solo mea i luga o le auala. Ae i ai le talitonuga, e le i i ai lava se taimi o fia ai ai se tagata Samoa. Ae ui i lea o le tuu mai o le anavatau lena, e faapea ona faamanatu pea i le Matagaluega o Faatoaga ma Faiga Faiva, ma o tatou tagata le taua. Ina ia ola pea ma faifaipea le tatou galuega, o le faia o mea lelei, vaega talafeagai aua le maua pea o mea taumafa mo nai o tatou tagata. O le soifua maloloina e ala i mea taumafa lelei ma le paleni, nutrition food supply. E tasi lena vaega o le anavatau o lo o faapea ona faatau e le Matagaluega o Faatoaga. E pei foi lea e fai ma faavae i lalo o galuega fai a le Matagaluega, e oo foi i aiaiga o mea e alu i ai seleni a lo tatou Malo. I le faaaogaina ma le fuafuaina ina ia i ai le tapasa. E fai ma tapasa aua le mautu ma le lelei e le gata i le faaaogaina o tupe, a o le lelei o le faatinoinao atinae. Lona 3, o le taumafai e uunaia le auina atu o tatou oloa i atunuu i fafo. E tasi lea luitau faigata o lo o i ai, ona e tofu lava le atunuu ma ana aiaiga. E le faapea na ona tatou manao lava e ave le tipolo i Niu Sila, tatou fetagofi tuu i le container ona ave lea. O le 2005 na taumafai ai le tatou tipolo e ave i fafo, ae na o le tahitian lime, la e talia e oo mai i le taimi nei. A o isi uma ituaiga tipolo e maua i le tatou atunuu, o lo o galulue pea ma le Matagaluega Va-i-Fafo ma le Matagaluega o le Primary Industries i Niu Sila. Ina ia mafai ona faaulufale atu, ona e tele, aemaise lava i mea ia. E sili atu lona tele ma lona lelei i totonu o le tatou atunuu, ae o lo o fai foi i ai le foi mai tua mai lena faigata. I galuega e tele a le Matagaluega o lo o taumafai ina ia faaauau ia le lelei o le tahitian lime, aua e i ai le taimi e 2, 3, 4 tausaga o faaletonu. O lea la e silasila le Matagaluega pe aisea, ae tasi lena o ni fua o faatoaga e ono uunaia i se taimi o i luma. Pe a faapea e tatala mai a tatou maketi.

Na faatinoina foi e le Matagaluega ni asiasiga se 10 i talaloa mamao o le tele o le atunuu. E faatasi ma i matou nei, ma Ofisa sili o Pulega ma Matagaluega. Na matou te asiasi ma tilotilo, e fia vaavaai i le tulaga o i ai

le faatinoina o faatoaga. E le gata na o tafa ala, ae pei o le tele o a tatou taumafaiga tetele e i luga i vaomatua ma talaloa mamao, i le tele o le tatou atunuu. Na matou asiasi ma vaavaai foi, o i ina na faavae ai lo matou manatu ina ua matou foi mai. I le tulaga o i ai le tiapula. O le tele o afioaga iinei i le atu Falealili, Lefaga, Safata ma le tele o nuu i totonu o Upolu faapena foi nisi o nuu e latalata i Salelologa. E tamaoaiga i le tele o tiapula fou ma taro varieties fou ia sa i ai. O lea ua taunuu mai e pei o le Salani, o le Fusi Nu 2, o lea foi ua faamanuiaina i le talo vave. E faapena foi le Tanumalala, ia ma isi. A o le tele o le vaega o Savaii na matou asiasi i ai, o la lava sa gata latou i le polo voli, ma le talo mumu lea sa tau o le Nu 1. O le ala lenei na faatupu manatu ai i le Matagaluega, i se faiga e mafai ai ona faatofusia lo tatou atunuu, i tiapula lea e tele ma maua mo le tatou maketi i fafo.

O le agaga faafetai ai i le Matagaluega o Tupe i le talia o le matou talosaga, o lea ua faatino. O le mea moni lau Afioga i le Fofoga Fetalai, o le taimi lava lenei, na o telefoni ita mai ia te au, a nisi o le au faifaatoaga. Tatagi le telefoni i le isi aso, ae valaau mai le tagata, fai mai, ua tele tele le talo, o le a lau mea o le a fai i ai? Ou fai atu, faafetai i le Atua Iona 2, faafetai ua maua meaai, tuu i lalo le telefoni. E faapena foi le isi aso, vili mai le isi tagata, o le faitio, ua le iloa po o fea le mea o le a tuu ai talo. Ae o le mea moni lau Afioga i le Fofoga Fetalai, e tele ia o faafitauli o lo o tutupu i lenei vaitaimi o le tatou olaga. E pei o le faamai, faamai e aafia ai ia vaa e lau ai a tatou oloa i fafo e malaga mai. Sau le vaa mai Niu Sila mai le isi taimi maua ai tagata mamai i le Koviti-19, taofi i Fiti. Ma aafia ai lava le tele o tatou pusatalo mo Niu Sila, i le amataga o Fepuari seia oo mai lava po o le vaiaso ea lea na tea atu nei, faatoa taunuu mai ai le vaa. O vaega na, tatou te manatu, e tutupu pea mea faapena, a o lau tali foi na fai atu i ai. Vaai outou ia e tele le talo, silasila i o tatou tagata sa maua le talo i le 5 i le \$20, la le ua fiafia. E faafetai i le Atua ia te outou, o le mea lenei o lenei e galo ia te outou le au faifaatoaga talo. O la e tatalo faafetai le toatele o le atunuu la e faatau mai i le maketi, ua le 5 i le \$20, ae ua 5 i le \$10. Ona e fai atu foi o lau tala na fai i isi tagata. Vaai outou o latou nei, a o outou taeao.

E i ai nai faafitauli o lo o aafia ai le tele o tatou talo, a o le mea sili i lou mafaufau lau Afioga, e faapena foi si a matou Matagaluega, e ui ina faitioina i le tele o le talo. O le mea moni, e pau lava lea o le atunuu o lea e tomumumu i le tele o meaai. A outou silasila i le amataga mai o le Koviti-19, o la o la ni que o tagata fia aai, la e sue le meaai, a o iinei... O lea la ou te faapea atu ia outou afioga le au fai faatoaga, faafetai tele lava mo la outou galuega ma lo outou galulue. Faafetai o lea e tele le mea taumafa aua Samoa ma ona tagata. E i ai foi le taimi o le a toe i ai foi le tatou pusa talo i luga i le \$77, i le taimi nei o la e \$45, \$48. Ae le tu ai pea i i, o le mea lenei e talosaga atu ai pea, aua tou te faavaivai. Lau Afioga i le Fofoga Fetalai, o

i ina i asiasiga nei na matou tilotilo ai i le tele o manaoga. E moni sa i ai le vaega o le olaga sa tatou faatali e o mai le au faifaatoaga ia tatou. A o le tele o le taimi ma le matou taumafai, o tatou, tatou malaga i tua, tatou tilotilo po o a manaoga. E le faapea o le a tatou o atu, tatou avatu uma mea uma. E leai, o mea e mafai ona fai, a i ai foi fautuaga e mafai ona fai ia i latou. Aua o nisi o latou, e mafai ona fai e latou, ae manaomia se fautuaga lelei, mai le Matagaluega e faatino ai.

Lau Afioga i le Fofoga Fetalai, e amata atu lea o se matou faamatalaga i tulaga ua i ai le tatou polokalame lea o le SAFPROM, ua uma le SACEP sa faia i tua atu, tele foi mea lelei na fai ai. E i ai foi lesona tetele na aoaoina e le Matagaluega. O lea la ua fai le SAFPROM o mea lelei o lo o faaleleia atili. A o mea foi sa i ai ni aoaoga na maua mai ai, ua faapena ona fesuisui ai le faiga o aiaiga, aua le faaaogaina ma le tuuina atu o tupe e ala mai lalo o le tatou poloketi lea mai le Faletupe o le Lalolagi, ma le IFAD, tuufaatasi e US\$23 miliona. O le galuega lena o lo o faatinoina. O se tasi vaega o le galuega lena, po o se vaega laititi o le seleni, o lo o ua fuafua mo le fausia o le Ofisa o Faatoaga ma Faiga Faiva i totonu o le taulaga i Salelologa. Ona o le taimi nei ua fai si feomai o le tatou fale o i ai i le taimi nei, o le ofisa i le taimi nei. Ma ua faapea le finagalo o le Matagaluega e faasafua, ina ia mafai ona faaaoga e i latou o lo o gaosi oloa ma i latou o lo o saunia oloa i le motu i Salafai, i lalo o le faiga faalisi i le va o le Matagaluega, po o lalo foi o le SLC, aua o i latou e ona le fanua ma tulaga faapena. Ae se i oo i le taimi e amata ai ona faatulaga ai galuega amata, ma maea ona faapena lea ona faamautu fuafuaga faapena o lo o manaomia ma polokalameina e le Matagaluega. O lea ua amata ona faasafua le tupe o le SAFPROM i tua i le tatou motu o Savaii. E fua atu e latou e laua oloa i Savaii, e fai lava si tele o le oloa e manaomia o mea tau faatoaga, o mea tau faigafaiva. O lea sa talosagaina ai le fesoasoani a lo tatou Kamupani vaa. Ma o lea ua tali mai le Afioga i le Minisita, o le a faapea ona galulue faatasi, ina ia aua ne i tuai le faagasologa o le tatou polokalame lea. Ma ia faapea ona ausia ia matatia ua uma ona faaataatitia e le matou Matagaluega ma le matou komiti, ia faapea foi le Faletupe o le lalolagi. Ina ia ausia i faiga lelei, faiga puipuia faiga e mafai ona maua ai le lelei mo le atunuu. Lau Afioga i le Fofoga Fetalai, i lalo o le polokalame o le SACEP, sa matou aumaia ai, le taimi o le pulega lena sa i ai. Sa fai ai le polokalame mo le faateleina o le manu papalagi, le povi se i tulou. O le vaega o le polokalame lena sa faapea ona avatu le povi, e pei e lisi atu le pulu i se maumaga, aemaise i latou e tetele a latou faatoaga. E faatataa ma a latou povi, ina ia maua le toto fou ma le toto lelei fou i inei ia faaauau ai pea le lelei atili o tatou manu papalagi. Ae peitai e lelei le faiga, e lelei foi le taunuuga ae pau lava lea, o le fuafuaga foi a uma ona matou faatauina lea o manu laiti nei. O nisi o manu e le o manu uma mo isi faifaatoaga laiti. Ae peitai la o le mea na tupu, ua aumai nei le tau o le povi e fai si taugata.

Ona faapea lea o le Matagaluega, toe sui le tatou kia, toe vaai po o le a se isi auala. O lo o i ai la le isi fuafuaga fou lea o le a faataatia e le Matagaluega. O nai afioaga pe tai 3, 4, pe 5 ia manu papalagi a se a tagata, ona fai lea o le latou pa tuufaatasi i lalo o le pulega mamalu a alii ma faipule. Ona avatu lea o le pulu e tasi, e avatu e faataa, aua e manaomia, e tasi le pulu ae 30 manu fafine e manaomia. Ou te manatu e leai se isi o le tatou Maota nei, e faapena e pei o le pulu. E faapena le faiga o le polokalame lea, o lona uiga a faapea e 60 manu fafine, e 2 pulu e ave i ai e le Matagaluega. Ae asiasi lava la i ai le Matagaluega, e fafaga e latou. E pau lava le mea e manaomia, e asiasia e le Matagaluega, e lelei faafoe le faatinoina o le faamoemoe. Aua a na ona leai lava, toe tuu le pulu i luga o le loli, toe faafoi mai totonu o le Matagaluega. I lalo o polokalame foi ia e pei ona i ai, o lea ua toe lalagaina ai se tasi o fanua o lo tatou Malo i gauta i Asau lea e faaigoaina o Masamasa. O le taimi a o le i faatuina le tatou lotoa lena, e lau atu lava i inei le povi po o lafumanu mo le faasoa i le motu i Salafai. A o le mea lea ua fai nei, o la ua amata ona fai a tatou lafu manu, i lena itu o le motu e faapea ona faasafua mo Savaii, po o a lava fuafuaga a le Matagaluega e tatau ona fai. Ma ia fai ia malupuipua ia manu e faapea ona tuuina atu i ai. E pei foi o galuega o lo o faia i Togitogiga, ma Lemafa ma Vaea i le taimi nei. E i ai le manatu, i lalo o le tatou stimulus package lea na fai nei, e le gata i le tiapula, ae o lo o faapena foi ona aafia ai ma le taumafai i mamoe, manu papalagi o meaituaolo, faapena foi moa o lo o faapea ona maua atu i lalo o le tatou polokalame. E le gata i lalo faatasi ma Saina, SCATEP, ae o le polokalame sa faatino i lalo o le SACEP sa maua mai ai tatou meaituaolo faapea foi ia lafu moa.

Ona oo mai lea o le faamatalaga i le atinae moa. I totonu o le 5 tausaga lenei, na tatou vaaia ai le faatuina o falemoa se i tulou a kamupani e 2. O Ah Liki i Tanumapua Farms faapena foi ma Frankie. O aso ia sa tai 2 masina oka mai a tatou fuamoia, faatoa taunuu mai i Samoa, e 3 ifo masina faatoa faaoga i le tele o taimi. E uma ifo foi ua tau le tutusa le manaia. A o le taimi lenei, fofoa ananafi le moa, ae taunuu atu i luga o le breakfast table i le aso e sosoo ai, po o le aso lona 2, po o le aso lona 3. O lona uiga, e le gata ua le o toe oka maia i fafo ia tatou fuamoia, a o lea ua mafai lava ona fai i inei, sefe a tatou tupe teu i fafo, a o lea ua maua si na faamama aveaga i le atinae o lafu moa. E faafetai foi i na i nei kamupani, e i ai foi le fesoasoani a le Malo e tuu i ai, i le taumafaiga o latou atinae. A o tatou i ai lava i le moa, o lea ua amata nei ona fausia le polokalame le fale fasi aano o moa o Frankie i Mulifanau. E taumafai e tuu ai le tatou faamoemoe i atunuu i fafo, aua le aano o le moa. O le faiga foi lea pe a oo i le taimi e faagaoioi ma faatino. E faamoemoe o le kamupani e aumai ia moa ma faaola ma faafofoa, ona ave ia latou o faifaatoaga, latou te tausia ma fafaga. A oo i le taimi ua tatau ona fasi, ona toe aumai lea i le kamupani e fasi ai, ma faatau ma maua le latou seleni. O se faiga lena e faamoemoe e

fesoasoani ai i le faaitiitia o le tatou taumafai pea e lau mai le moa mai fafo. Ina ia lagolagoina le faamoemoe, o lea ua i ai le polokalame e fai ai lava i inei le meaai a moa. I lalo o le phase 5 o le tatou SCATEP project, le poloketi lea ma le Malo o Saina. O lo o i ai i lalo o se tasi o vaega e fausia le fale e fai ai le meaai a moa. E faapea ona faatau atu e le Matagaluega po o se kamupani foi e fai ma agent, e sili atu lena, i le au faifaatoaga. O suesuega na faia i le taumafaiga o le faamoemoe lea, e tusa i le taimi nei, ua 60% e taugofie ai le tau o le meaai a moa ia na i lo le meaai lea e faapea ona aumai mai fafo i le taimi nei. O lona uiga ua lava lena faamama avega, ae at the same time, o le a faapea foi ona sefe ai tupe teu i fafo atu o Samoa, ae o lea o le a gaosia i totonu lava o le tatou atunuu. I le lagolagoina lava o lea polokalame i le faiga o meaai a moa. Ona e talu ai e manaomia tele le fish bone, e tele le ponaivi ia e manaomia. I le taimi lenei ua uma ona fausia le fale e fasi ai le ia, ma sauni ai le ia mo maketi i fafo, a se tasi o kamupani, Apia Tutis Fishing i luga o le uafu. Ae talu ai o le Koviti-19, e le i mafai lava ona malaga mai a latou inisinia e faamaea le tapenaina o le fale lenei mo le faamoemoe. Lona 2, o le masina na tea atu nei o le aso, 22 Tesema. Na tatalaina ai le fale Cold Storage a se tasi o kamupani o le Join venture i le va o le Whuanan Fishing ma le Kamupani o le Swire ma le kamupani a le tasi o alo o Samoa, le tofa ia Tusa Victor Vaai e tau o le Tui Pacific. O le kamupani lea ma lona history, o le kamupani lenei o le Whuanan, sa latou fagotaina le latou ia i le Pasefika, lau mai i inei i le tatou uafu, ona tuu container lea ma ave i fafo. O lea e tau e tatou i le faa-Peretania o le transshipment. E tusa na le pau lena o le service tatou te faia, ae ui lava i lea, e tele lava seleni. O le 2019 ina ua gaioi tele ma alualu i luma taumafaiga a le kamupani lea. E na ona faatau o meaai mo seila ma le fesuaiga o seila ma tulaga faapena, ae \$14 miliona le tupe a lo tatou atunuu na maua mai ai. O le ia foi la sa avatu i lena taimi, e le taua o se export a Samoa, e sau mai lava i le atunuu na fagota ai. A o vaa uma o le kamupani lea, e ova i le 117 vaa fagota. Ae talu ai ona o le Koviti-19, ua faaitiitia le aofaiga o vaa e fea mai, ona o le puipuiga malu a lo tatou atunuu, i faamai sa i ai. O se mea lelei le mea lea sa fai e le tatou komiti, ua atagia ai foi. E ui ina tatou manao i le tupe, ae sa manumanu lava i le upega. O lea sa faapea ona faamuamua le tatou saogalemu, na i lo le tatou naunau i tupe e maua mai i feaatauaiga ia. O le tulaga la lea ua i ai nei, o le a faapea ona process i inei le ia a le kamupani lea, ona lafo lea i fafo, ua faitauina foi la o oloa auina atu i fafo e le tatou atunuu, e ui lava o le tele. Ma o latou vaa fagota uma, e fagogota i Atu Kuki, Niue, Kiripati ma isi atunuu o le Pasefika. E oo foi i luga o le high seas, pe a faapea e amata ona tatala a tatou port mo sailors, o le a avatu uma lava o tatou oloa e auina atu i fafo.

Mo se faaitaiga mo le vaitaimi o transship le kamupani lea vaa, 160 container na avatu i fafo e Samoa i le taimi e tasi. A silasila la i le 160 lena

i le tele o le freight, tele le labour sa faaoga i le lauina o le ia. O lona uiga o lea o le a faaopoopo mai ma le isi vaega lea o le process o le kamupani lea, e faatino i totonu o le tatou atunuu, o le a lelei, ma maua ai galuega a lo tatou tagata. O lea e avea ai ma sui o le tatou Kapeneta ma le Malo e faafetai ai foi i taumafaiga a nei kamupani. E le gata ia Frankie o Ah Liki, o lenei kamupani o Tui Pacific, le kamupani a le Apia Tutis fishing, ma le tele o kamupani. E oo foi i kamupani i Samoa, o i ai nei o le Apia Fish Packers. E ui ina laititi le latou taumafaiga, a o la e i ai lo latou sao i le tatou tamaoaga. O le aoga la o le ia lea ma ivi, o le a ave le ivi i uta, i le mea e fai ai, le meaai a moa. O le taimi lenei a faatau mai Tutuila le fish bone, e 90 sene i le pauna, e fai lava si taugata. Ae a faapea la e fai i inei, ua ou faalogo atu, e pei uma lava e 20 sene ea pe 10 sene i le kilo. O mea lelei uma lava, aua le taumafaiga o lo o taumafai ai nei le Matagaluega o le Fisheries Division, o le Matagaluega o Faatoaga, ma Faiga Faiva, faatasi ai ma le lagolagosua a lo tatou fale suesue. O nei mea uma, o le tele ia o le part, po o le vaega a le SROS o fai i ai. O le Aso Lua o le vaiaso lenei na tatalaina ai se vaega o le tatou fale suesue, o lo o i ai foi se vaega i totonu i ina. E le gata i le store ina o sample o mai faapenei e pei o le Koviti-19, le mai o le African Swine Fever ma mea faapena. Ae o lo o i ai foi le vaega e siaki ai ia ia, mo le saogalemua mo le auina atu i atunuu i fafo ma maketi i fafo. E pei ona fai atu lau faamatalaga i le taimi ua tuanai. E tofu lava le atunuu ma le latou tulafono, latou aiaiga, e le mafai. E oo lava lava ia tatou ia, e le mafai ona o atu tuu i totonu o le container avei Amerika, ave i Rusia, ave i Saina, ave i European Union, e le mafai. A o le faia ma le faatuina o le fale o le vaega lenei o le SROS, e fai ai suesuega ina ia mafai ona avatu e se fale suesue ua uma ona certify e se isi faalapotopotoga o le lalolagi, i tulaga faapena. E talitonuina ai le safety ma le lelei ma le saogalemua o tatou mea taumafa ia e lau atu i fafo.

Lau Afioga i le Fofoga Fetalai, o i ina o lo o tele le tatou galuega o lo o fai i ai, aemaise le vaega o le faiga faiva. O lo o fai ai foi ma isi vaega e pei o faasao, la ua uma ona fai atu i tua. E tasi lenei o... e manatua ai pea lenei sui o Faleseela ma Lefaga i le faasao o le latou nuu, lea na pisapisa mai ai lava, lea ua uma ona fai. E tasi lenei vaega o le tatou Matagaluega e fai, e galulue faatasi ma le Siosiomaga. E i ai foi ma le vaega a i latou o le STA, Samoa Tourism Authority. Ona a lelei le faatautaia o nei faasao, o le faisua ma isi mea, e mafai ona fiafia. E pei o le mea lea sa tupu i Savaia i Lefaga, fiafia tagata e maimoa pe a oo i le taimi e toe tatala ai a tatou malaga mai fafo, e fia matamata i ai. E le gata i lea, ua uma foi ona fausia uma a tatou ramps i le motu o Upolu, ma nuu na faapea ona talosaga mai. E pei o le itumalo o le Afioga ia Mulipola, o lea ua uma ona fausia ia ramps, o lo galulue foi le matou Matagaluega i le faatupeina, ae galulue faatasi ma le Matagaluega o Uafu. O moli o le ava ona o le tele o vaa e faaogaina o vaa fagota. O ituaiga galulue faatasi lenei, e lelei ma matagofie ai, e oo foi i le



vaai mai a tatou afioaga, i le tatou pulupululima faatasi o Matagaluega a le Malo, o i ina e atagia ai foi. E ui e le o le mea lena, ia le lelei o pulega a Matagaluega a lo tatou Malo e faatautaia e le tatou Kapeneta ma le Palemene.

E na ona ou faapupula atu, o le vaitaimi o le Koviti na i ai le manatu o le a faapea ona faaletonu meaai, faaletonu foi le tatou export po o fua o faatoaga e lau atu i fafo. Ae peitai o le loto tetele o le pulega, ou te fiafia lava e faapea atu. O le 2020, o le aofaiga o le talo o le tatou export mai ai Ianuari ia Tesema, e \$10,003,828, o le talo faaaisa, \$761,476, o le copra mill e \$1,200,024, coconut oil, \$2,890,092, nonu juice \$18,861,930, o le popo, \$2,316,125,53, o le koko la lea o le koko malu, ma le koko lea e produce sukalaki lea e produce e Wilex ma isi vaega e pei o le Savaii Koko, e \$998,656, o le tatou ulu faaaisa, sa i lou manatu e le faapea se tupe e maua, e \$111,000, o isi mea e pei o le sasalapa o le ufi o le fai faaaisa, e \$198,464, o le ava e \$228,000 o le ava lea e ave i Amerika. O le ia, lea e tasi le kamupani lea sa avea i fafo, e \$23,278,963, o le fuamoa, o le isi mea lelei lea ua i ai, o lea ua le gata o lea ua tatou tusasami i fuamoa fresh, a o lea ua export a tatou fuamoa i fafo, i lalo o le Kamupani a Farmer Joe, e 382,292 le aofaiga o fuamoa o lea sa export i le vaitaimi o le 2020. O le mea matagofie lea, sa faapea ai a tele a tele lo tatou afaina. E tele lo tatou afaina i le tulaga tau ia, ona o le faaitiitia o tatou vaa, aepeitai e ui i lea, o lo o vaaia pea o lo o feololo lava na i seleni o maua mai. Ae mataulia la i vaa fagota nei ona e tele, e le na o le pau lena o le tupe e maua ai. E ese le latou contribute i le tatou export, a o le latou local expenses i le kamupani lava ia lena, e \$18,484,000 i le tausaga. O le ...Fisheries e \$11 miliona i le 2020 lea. O lona uiga lau Afioaga, le taumafaiga lea e taumafai i ai le Malo mo le fausia o le uafu i Vaiusu ma Asau, e le o se taumafaiga e le o iloa o se taumafaiga o fai pogisa. Ona o matou lea e vaaia le isi end o le faamoemoe lea, lea la ou te fai atu au i le tulaga o lo o i ai. O le isi mea e aupito sili ona lelei i le faamoemoe lea. O le suauu e manaomia. E le o mafai e lo tatou storage i le taimi nei, ona utu ia vaa a le Whuanan i le taimi lava lena. Ona o lo o ave le faamuamua mo a tatou manaoga a Samoa, e le gata i lea o le generate ina o le tatou eletise. O le ala lena, o Whuanan ia e le o mafai ona utu ina i inei o latou vaa fagota. A o le vaa fagota e tasi laititi e 60,000 lita i le vaa e tasi i le taimi e sau ai i totonu e tuu le ia, ma toe ave i fafo. Ae vagana ai si kamupani lea a le Whuanan o lo o utu pea i inei ia latou vaa, ona e leai se isi uafu e mafai ona o i ai, na o tatou lava. Ona o lea e laisene uma i inei a latou vaa. O le faamoemoe foi lea ua ou vaai, talu ai nei po o le tausaga na tea atu nei, na ou vaai atu i le pepa ua faamaonia ai le fausia o se tasi o tane suauu. Ou te lagona o le taumafaiga lava lea o si o tatou Malo, o le faamoemoe ina ia faatele le tatou ability e store le tatou suauu. Ona o le tele... o le isi mea o i ai o lo o fai nei feutagaiga, e 400 o latou vaa i le Pasefika, o lo o faia faatautaia e le

Matagaluega o Faatoaga Faiga Faiva, a o mea uma na, e faapea ona faamoemoe uma lava i le taumafaiga lea e taumafai e fausia le uafu, i Vaiusu ma le toe faaleleia o le tatou uafu i Asau, pe a faapea e talafeagai i le tele o mea o lo o fuafuaina. Ae o lea ua maua mai le folasaga a le Minisita o Galuega tetele a le Malo ananafi ma anapo, o lea lava ua i luga le faamoemoe lena mo Asau foi.

Aua o le mea moni, lau Afioga i le Fofoga Fetalai, na o atu foi isi, leaga o mea nei sa talanoaina. E ala ona ou avatu le mea lenei, na o atu foi nisi pelogia lo matou itumalo, fai mai, e le faataunuuina lena mea. E le faia, e leai se uafu e faia, e le faia le tou uafu Asau. Ua laki lava pe toa-lua pe toa-tolu le aualii o le matou nuu na o ai. O lea na aloaia i le folasaga a le Palemia i le amataga, a o lea foi na folasia ananafi e le Minisita lea e nafa ma le Matagaluega. O lea o le a fai le tatou uafu, e manaomia a tatou galuega, e manaomia le atinaeina o le la itu o le tatou motu. Ina ne i te i ua faapea outou... e tusa o le mea lea ua tupu, ua o atu tagata ese ua faasese ma tau pepeloina le sui o le itumalo. O tagata o le eleele, ioe, o au o le Asau, ou te nofo i Asau, na ou fanau i Asau, na ou aoga i Asau, na ou matua ae lava ma tausii lou nuu o Asau. O le tama o le eleele, ae o atu fai i ai e pepelo uma mea ia e fai atu ai le tamaititi o le nuu. Ia toaga lava e fai, o le tamaititi o le nuu i le isi taimi, e faapena ona uiga. O isi taimi e tau le tau tatala le gutu o le tamaloa, po o le a lea leaga o lima ae a oo i le taimi e faaletonu ai, e faapena le faiga o le olaga. Ae ou te manatu o mea faapenei, o lea e ala ai ona fai atu, o mea lelei o lea e faia e le Malo. O lea ua ou avatua ia outou le faamaoniaga, o mea ia e tutupu i le taimi nei. A o le taumafaiga a le Malo mo le tatou agai i luma, faateleina le tamaoiga ina ia mafai ona ola ae o tatou tagata,

**Susuga Hon Laauli Polataivao Leuatea:** Lau Afioga o se mea e fia faamalamalama.

**Tofa Hon LOPAOO NATANIELU MUA:** E le i aafia se matou Matagaluega i le saunoaga a le sui lea. Ou te le faatonuina le Nofoa, tuu atu...

**Susuga Hon Laauli Polataivao Leuatea:** Ona o lea ua taua lau Afioga e fia maua se faamalamalama ona o lea ua taua le matou talapelo, le matou talaole. E fia faasao leaga e le o le upu lea na matou faia faamolemole. Tuu mai se matou avanoa.

**SUI FOFOGA FETALAI:** Faamolemole lau Afioga i le Minisita, se i fai se tala a le Nofoa i le sui usufono. Malie le sui o Gagaifomauga Nu 3, e i ai le manatu o le Nofoa e le i taea lava le mamalu o lau Afioga, o lea lava e saunoa faalauaitetele, ma e i ai le manatu, malie le sui, ou te le faatagaina.

Ona e le o taua lou suafa, ma le itumalo i tulaga uma. O lea lava e talanoa le Minisita i lona lava lotoifale. O le mea la lea e faamalulu atu ai i le sui usufono, ou te le faatagaina le faauilavea.

**Susuga Hon Laauli Polataivao Leuatea:** Malie lava lau Afioga, o au nei o le Taitai o le Vaega Faaupufai o lea na ave le savali lea e tau faalauaitete. E tuga le tuuaiga lea faapea ua o matou o atu folafola e le taunuu le uafu i Asau. Malie lau Afioga o i ina lea ou te fia tulai atu ai. Ma lou agaga faaaloalo.

**SUI FOFOGA FETALAI:** Faafetai, malie le sui usufono, e le o taua i se tulaga o la lava e saunoa ia i lona lotoifale, o ia o le tama o le eleele. Ae o le faauilavea, seivagana ua i ai ni tulaga ua manatu le Nofoa e tauga, ona ou faatagaina lea. Ae malie le sui usufono, o le a... faafetai, faafetai.

**Susuga Hon Laauli Polataivao Leuatea:** Ia, ua foi sou lagona, malie lau Afioga pau lava lea, e leai se matou upu e faia. Asau, e fai le tou uafu pe a taofi le uafu i i i Vaiusu. O le tu atu lena e faasao.

**SUI FOFOGA FETALAI:** Fale i le fale o le Atua lou finagalo. Malie lou finagalo le sui usufono mamalu Gagaifomauga Nu.3, fale i le fale o le Atua le tofa. Tulai mai le Afioga i le Minisita o Faatoaga e faauau le saunoaga.

**Tofa Hon LOPAOO NATANIELU MUA:** Faafetai lau Afioga, ou te le i taua lava se igoa o se isi, ou te le iloa. Na ou taua Papalii se igoa o se isi pe leai? Ia o la e molimau le Afioga i le Fofoga Fetalai, e le i taua lava se igoa... ou te le i taua foi se Pati, ia tailo. Ia o lona uiga e guilty latou aua e le iloa po o latou, a o au ia ou te le i taua se isi.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai...

**SUI FOFOGA FETALAI:** Malie le Afioga i le Minisita se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le tatou Tulafono Tumau seiloga e 8 ni sui o se Vaega Faaupufai faatoa aloaia lea i totonu o le Maota lena. O le mea lea na tulai mai ai le sui usufono e matua sese i Sini. E na o le pau lava le Vaega Faaupufai na matua aloaia o le HRPP. Ua pepelo soo le Maota ma le atunuu e le sui usufono faatoa maea atu nei.

**SUI FOFOGA FETALAI:** O le mea la lea sa musu ai le Nofoa e talatala i tua, leaga e manino lelei le Nofoa i tulaga uma nei. Manino, o lea lava e tutu toatasi ia sui usufono mamalu e fai ma sui usufono o itumalo taitasi, e le i oo i le taimi o le tulaga lea e saunoa i ai le sui usufono. O le mea la lea na ou manatu ai, ua lava lea, ae faaauau...

**Susuga Hon Laauli Polataivao Leuatea:** Ioe lau Afioga, se o le ala lava lea o loa tulai atu, e faafefea na manino tuuaiga pe a le aumai se avanoa? Faafefea na manino lo matou tulai atu Nafotoa pe a leai se avanoa e te tuu mai? Se ta te ofo...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O lea e taoto a tatou Tulafono Tumau.

**SUI FOFOGA FETALAI:** Se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O lea foi ua uma ona fai ia lau faaiuga, o mea e talanoa atu i fafo o le Maota e le faaogaina i totonu o le Maota. Afai lava la e tulai mai, o lea e tulai mai le sui usufono ma tau mai o ia o le Taitai o le Itu Agai. E leai se mea faapea i totonu o le Maota. E na o le tasi lava ia le Vaega Faaupufai e aloaia i totonu o Tulafono Tumau e na o le 8, o lea foi la e na o le HRPP seiloga e atoa se toa-8. Ae e le i aloaia se Vaega faapea.

Ua soli Fono tele le sui usufono.

**SUI FOFOGA FETALAI:** Ia, e le toe ta i tua ia sa matou faamatalaga, malie le sui usufono, ou te le toe moomia le tulai mai. Faauau le saunoaga a lau Afioga i le Minisita.

**Tofa Hon LOPAOO NATANIELU MUA:** Faafetai i lau Afioga i le Fofoga Fetalai, e avatu foi malu i puega i lau Afioga leaga ia o isi taimi e sopoia lava e manuvale le fogatia. Malo le onosai, o lea foi ou te onosai, ae malo lava le onosai.

**SUI FOFOGA FETALAI:** E lava le onosai o le Nofoa, saunoa.

**Tofa Hon LOPAOO NATANIELU MUA:** Ae o lea ua ou oo mai i le tatou vaega ua uma le moa, ua uma foi ona avatu le faafetai i nai kamupani ia o lo o taumafai le atinaeina o le tatou moa. Ia ae faafetai foi i le tatou poloketi lea, faafetai i le Faletupe o le Lalolagi, faafetai foi i le Afioga i le Minisita o Tupe ma le tatou Matagaluega o Tupe e pei o latou e faia le

aunauga e faamua le faiga o feutagaiga o tupe nei, e mafai ai ona maua e Matagaluega e pei o le Matagaluega nei o Faatoaga ma Faigafaiava ma le SROS, seleni nei. Ia e malo lava i le tou taumafai e faapena foi ona faafetaia ia le tatou Polokalame lenei e pei o Samoa China Agriculture Technical Assistance Project.

O le tele o le tatou vegetables lea e i ai, o le tele ia o le sao o le tatou poloketi lenei, i le lelei ma mautu o le faamoemoe e pei ona i ai nei fualaau aina, fualaau faisua... o le taumafaiga e pei ona i ai le anavatau na tuuina atu i le amataga, o le soifua maloloina e ala i meaai paleni, i meataumafa paleni. O le taimi lea na fai ai le tatou South Pacific Games, 90% o tatou fualaau aina o tatou fualaau faisua na maua uma atu lava i le tatou atunuu. I taaloga muamua atu, o le tele ia o le vaega na... o tatou meatausami o taaloga na oka mai i fafo.

O le tulaga la o i ai le tatou vaega, o le aufai fualaau, fualaau aina ma fualaau faisua, ia o le manaia ia. Ia a ta alu foi ia tilotilo i ai, oka manaia. O isi taimi e ta te le fia fai togakoko, e pei e sili ai pe a ta alu e fai le mea lea, aua e na o le 18 lava aso, o ta alu atu nofonofo ma le kapisi i luga o le auala pe \$2 pe \$2.50 pe \$1.50 foi e alumia lava.

Ia e tasi lena o faasea ua taunuu mai ua taugofie foi vegetables. Ia o le faiga lava lea o le olaga, o tulafono o le maketi, o le price e pule ai le supplier and demand. O le manaomia ma le supply. A tele le supply ua laitiiti ia le tatou maketi, ia e faapena ona... ae i ai foi isi taimi e alu i luga, o le tama lea e alu faapenei i luga o isi taimi e alu i lalo. So e le faapopoleina ia lo tatou atunuu i tulaga faapea. Ae faafetai tele lava i le tatou vaega o faatoaga le isi vaega lea o le tatou Sector i le aufaifaatoaga o vegetable garden, tatou faatoaga o faisua, o tatou fruit trees, faafetai i lo outou sao.

O le a oo atu ia le tatou folasaga, o le taimi na o le toe foi laitiiti lava i le povi, oi le manupalagi, ina ua taunuu mai ia le Koviti ma ua amata ona loka ia tatou borders, na fai ai loa le assessment a le Matagaluega, e sue atu. Pe a le mea e tupu pe a faapea ua tapuni uma ua le toe mafai ona toe aumai ia tatou manufasi mai i fafo. Po o le moa po o le a.

I le suesuega na fai, e 2 tausaga e mafai ona faamoemoe le atunuu i le aano o le manupalagi o lo o i totonu o le atunuu ona run out lea. O lona uiga, o lea faatoa toetiiti lava 12 masina talu ona i ai. Ia ae le faapea o faaletonu ia le tatou faamoemoe o lo o lava pea le tatou meaai o aumai mai i fafo. Ia e faapena foi i le tatou mamoe ua faateleina lava le fuainumera i lalo o le Stimulus lea na fai nei, o la ua avatu ai i se tau taugofie, e totogi e le Malo le isi vaega o le tau o le mamoe, povi ia ma le meaituaolo, ae e totogi e le faifaatoaga le isi vaega, ina ia faafaigofie ona faaleleia o atinae, faateleina atinae faapena a le tagata, a o i latou o lo o taumafaia, ae la e i ai sina vaega o le seleni e amata ai e ia le atinae, ia e faapena foi ona galulue faatasi ma le Matagaluega ma ua uma foi ona aumai le lisi, ma ua avatu le

faatagaina e le Matagaluega o Tupe faapea foi ma le Kapeneta, ina ia faasafua ai i tagata o le faamoemoe lea.

O mafaufauga autasi lava lea, ina ia faateleina le atinaeina o nei atinae o faatoaga e ala i lafumanu, ia e faapena foi i tulaga o faigafaiva ua uma ona tea atu. O le isi tulaga o lo o i ai le tatou vaega o faigafaiva, o le a faapea ona... ua silasila le Matagaluega i se fausia o sana research station, o lea foi ua i ai le fanua ua uma ona talanoaina, ae e toe lava o le faamaoniaga ma le...

**Tofa Lealailepule Rimoni Aiafi:** Lau Afioga i le Fofoga Fetalai...

**SUI FOFOGA FETALAI:** O se mea e fia faamalamalama..

**Tofa Lealailepule Rimoni Aiafi:** O se mea e fia talanoa ai, leaga o lea ua oo tonu i le SROS lea sa ou taua i totonu o lau lauga.

**SUI FOFOGA FETALAI:** Ia, lelei, saunoa...

**Tofa Lealailepule Rimoni Aiafi:** Ae o le mea la lea e fesili ai, o lea ua oo tonu lava i manupapalagi, ia o lau fesili lau Afioga, o fea ua oo i ai le tatou taavale lea na aumai e fasi ai ia tatou manu? O le isi vaega, o le mea la lea na ou taua o tagata foi ia e foi mai i fafo, lea e omai ma skills fasimanu, aua o lea e tele ia manupapalagi iinei, manaia ae fai ia ni latou trainings, i manu ia papalagi aua e i ai le latou fale fasimanu, ia e sau le valaau, ia ua i ai, ua vave ua o latou iloa lelei, o lea e i ai ia tatou tama ia e aoa.

Ae o le mea e fia malamalama ai lau Afioga, o le tatou taavale lea foi fasimanu, leaga na i ai manu lea na fasi i le maliu o si o matou tina, ia na ona o atu lava o tama fasi ma aumai. Ma le faaloalo lava.

**SUI FOFOGA FETALAI:** E ese le aanoa o le fesili, ia se i tali le Afioga i le Minisita.

**Tofa Hon LOPAOO NATANIELU MUA:** O lea e tusa e tasi le laa lea e muamua ai le Afioga i le sui usufono mamalu i le Minisita o lea ua... a lea e uma loa le parakalafa sosoo loa ma le fasimanu. Ioe, ae ui i lea, o le a ou tali atu i le faafesili, e

**SUI FOFOGA FETALAI:** E pule lava lau Afioga, faatali se i oo i ai le faasologa te i foi ua toe fefoifoia.

**Tofa Hon LOPAOO NATANIELU MUA:** O le tulaga ona ua oo tonu lava i ai, o lea la o le a ou tali muamua i le fesili ae tuu le folasaga lea atonu e tali atu ai ma nisi fesili ma nisi fesili se i faamalamalama atu.

O le tulaga o le tatou loli e le o lelei, ou te lagona pe na tupu le mea lea e te saunoa ai faapea o au manu na faapea ae po o la e i Savaii. Leaga o le loli lava lea e tasi, e na te faia le galuega i Savaii faapena foi Upolu nei. O le pisi o le loli lenei e matautia lau Afioga ma le mamalu. O lo o i ai foi le polokalame le na... mo lou silafia leaga na e fesili mai ae lea o le a tau atu, o la sa lau mai le pepa na faapea na avatu le tatou loli e fia fai lana service. Po o le mea ua amata le service, ae e le i oo i le taimi e tatau ona fai ai, ae ui i lea, e lelei. Afai o le faiga lea, o la e muamua fai le service ae le i oo i le taimi e due ai, o se mea lelei lenei, mea lelei lenei mo le Matagaluega ia malupuipua aseta a le Malo.

Ae o le tulaga o le fasimanu, i lalo o le tatou polokalame o le SAFPRM, o lea ua faauma le design po o le ata o le fale, faiga mo mea o tanevai, e tuu ai le vai ma store ai le vai, e sau mai i totonu o le fale fasimanu, faapea foi le aumaia o potu tetele, e aumai e faapea ona faasolo aua le faamoemoe lea. O lo o i lalo o le tatou polokalame lea o le SAFPRM, ma ua uma foi... e i ai foi le mafaufau lea se i toe silasila ona o tulaga i nuu po o saogalemu pea. Ia ae fai mai ia nai inisinia, ma i latou o lo o galulue ai, o lo o malupuipua pea ia le tatou vaega na e nonofo i.. ma aumai i lenei vaega o le atunuu, i le faatuina o le tatou fale fasimanu i o.

Ma e o le faamoemoe lenei lea e i ai, ae talu ona fai ia tatou bonds ma fausia ia tatou pusaaisa ia, o lea ua fai le design ou te iloa e tender a le o se mea o masina fou o Aperila, ia ona faamaea loa lea o le galuega lea, ae la ua uma ona fausia le fale, ia ma le auala ma sua le fanua, ia toe lava o le faamaea o le tatou galuega lenei lau Afioga aua o le mea lenei sa faamoemoe ai e talatalanoa i le mataupu lea.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai...

**SUI FOFOGA FETALAI:** Malie lau Afioga i le Minisita, se i tulai mai le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Masalo e mafai e le Minisita ona toe... se i toe aumai lava se faamaninoga o lea ua aumai le aofai o manupapalagi, se i toe aumai lava le tulaga o le tatou mamoe. O le agaga lau Afioga i le Fofoga Fetalai, i le iuga na fai e le Kapeneta i mamoe nei ma le atinae, o le agaga foi ia uunaia le tasi lenei atinae e faaopopo e tali mai i le fofoga taumafa o le tatou atunuu aemaise o le fiafia o tatou

tagata i le aano o le mamoe. Pe a manatua o le 1999 na amata ai ona faafesootai e le Minisita sa i ai i le tatou Matagaluega o le Agriculture o Faatoaga ia le Malo o Fiti ona ua fai si ola tele o le latou mamoe lea ua faapitoa mo atunuu e mafanafana.

O le itu taua ou te faatauaina ai ona e le i talia e Panimarama i le Kapeneta sa i ai, ae ona ua sui le Minisita le Afioga i le Tuisugaletaua o Tuisuga sa avea ma CEO po o le Pule o le Agriculture a tatou, lea la ua tulai mai i le tulaga o le Minisita, o le Minisita lea i tulai mai Fiti e uomamae e masani ona feiloai i fonotaga a CEOs. E tusa o latou e pule, e pei la o le itu lena na faigofie ai ona tatou maua le avanoa lea, ina ua auina ai e le Kapeneta ia Tuisuga e faatalatalanoa lea na sau ai le uta lea muamua o mamoe.

Ua ala la ona ou taua le itu lea, ona ua ou matauina le tele o faatoaga mamoe i aiga iinei i le taulaga i Apia ona o le faigofie foi ona vaaia mamoe. A o mamoe foi, o le matua lelei lava. Ae pe mafai ona... se i aumai lava se faamaninoga, po o le a le tulaga lea e i ai ia faatoaga mamoe.

**SUI FOFOGA FETALAI:** Ia se i tulai mai le Afioga i le Minisita e tali.

**Tofa Hon LOPAOO NATANIELU MUA:** Ia lau Afioga faafetai mo le faauilavea. Ia o le tulaga ua i ai ia le tatou mamoe, ova i le 2,500 le tatou stock lea ua i ai i le taimi lenei. O lea foi la e tele le fesoasoani i lalo o le stimulus lea na aumai ai. O le isi tagata fai lafumanu, e 15 ana mamae na aumai i totonu o le Matagaluega, lea e toe kiliva atu e le Matagaluega i isi tagata e fesoasoani i le vaega o le tatou lafumamoe lea e i Lemafa ma Togitogiga. O lo o i ina le tatou ia faapena foi ma Asau. E i ai le manatu ua uma foi ona fai ia le tatou tofotofoga o le mamoe lenei, e ese ua sili mamao atu na i lo le mamoe lea e aumai mai i fafo.

Ae o le mea lea e tau taofiofi ai le faatamaia o tatou o mo mea o taumafa i le taimi nei, o le faatupuina o le tatou stock. A faapea e tele aua o le tulaga lea ma le faigofie ona tausii o le manu lenei, e tau le faia se pa ae e pau lava le mea, a fai ni au mamoe aua le fai ia ni au taifau. A fai ni au mamoe aua lava ne i fai ia ni au taifau, e uma ona tausami e taifau ia au mamoe. Ae o le tulaga lena o le faigofie e tusa po o le a o lou nuu e gaoa, ae ola lelei ai foi le manu lenei.

O le mea foi la e taumfaia ia lava e i lalo o le tatou stimulus lea 1,2 ua faafetai tele lava i lau Afioga i le Minisita o Tupe ma le tatou Matagaluega, i le mafai ona tali mai i le faamoemoe lea. Aumai e tatou aua o lea ua uma ona faatau mamoe a isi tagata, fai ia latou lafumanu, fai ia latou lafumamoe, ae o lea e manao tatou e faasoa atu i isi... ia lea la e aumai ai le seleni i le Matagaluega o Tupe, ae tuu atu i o.

E fai sina... na matou talatalanoa ma le Matagaluega ou fai atu ua fai sina tuai tele o le mulitiplication. Ae toe tilotilo i nisi itu o le tatou faamoemoe,



pe tatau ona... pe i ai se isi auala... o lea foi la ua fai ia le tatou lala i Asau i Masamasa, ia o le mea lea ua ou vaai atu i le mamoe sole, e masaga lua, o isi taimi e masaga tolu, ia pe a fanau le mamoe e tasi. O lona uiga la o le ituaiga base lea, e vave lava... o le mea lea ua taumafai i ai le Matagaluega e faasoa ai, ia vave le faasoa atu, ma toe taumafai ai e faasoa mai, ae taumafai lava e taofiofi seivagana le manu ua tatau lava ona faalalo, ma faaaoga aua a umi tele foi ua le aoga, ia faatoa fai lea o le tulaga lena.

Lau Afioga e pei ona fesiligia e le Afioga i le Palemia, e i ai lo matou manatu o le talitonuga foi lena o le Matagaluega, e fai sina tuai laititi o le multiplication. Ae a fuafua i le taimi na ou taunuu mai ai e 700 mamoe ae lea ua 2,000 ma ona tupu 500, ia ou te lagona o se galuega lelei lea, mo tatou i le taumafaiga e latou o lo o popoto i lenei mea. Ia o le faiga o le mamoe ou te le iloa po o le a le mea e tuai ona fanau le mamoe, a fuafua i ai tailo. Ae o le manaia ia e vave, pe tai fia ea masina e pei o le tagata e 9 masina.

Ia lau Afioga o le tatou...

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai...

**SUI FOFOGA FETALAI:** Malie le sui usufono, sa taua i lau lauga le mea lea e te taufaauilavea ai?

**Afioga Fuimaono Teo Samuelu Teo:** O lea lava...

**SUI FOFOGA FETALAI:** Malie lau Afioga i le Minisita se i saunoa le sui usufono o Falealili.

**Afioga Fuimaono Teo Samuelu Teo:** O le tulaga lea ona o lea o le a see ese le Minisita ma le tulaga lea o le lafumanu i mo mea o povi se i tulou le Maota. O le faafesili lava i le tulaga o le ... sa i ai le polokalama lea sa aumai i totonu masalo po o ua 10 nei tausaga. Pe le o toe faaaogaina le polokalama lea ma le tausue o pulu foi ia faapitoa e tataa ai manu ona o le utiuti o tatou manu ia.

Ae sa i ai le vaega foi lea sa aumai faapitoa ai mo tissues foi ia, ia lea na mafai ona insert i tatou manu fafine e aunoa ma le feusuaiga se i tulou manu, lea e faaaoga ai le poa. Ae sa faaaoga vaega na, lea sa fai ai ia tatou lafumanu i pulu ia mai fafo. Pe le o toe tau i ai le silasila a le Afioga i le Minisita i vaega ia e pei e taua atu na toe vave, i lo le taumafai e sue nai tatou pulu ia, mo faifaatoaga, ma le agaga faaaloalo.

**SUI FOFOGA FETALAI:** Ia, se i tulai mai le Afioga i le Minisita.

**Tofa Hon LOPAOO NATANIELU MUA:** Ia o le faiga lena e tau o le artificial insemination, o la e ua i lalo o se vaega i le polokalame lea o le SAFROM. Se i ou toe confirm ina le mea lea ona e i ai le taimi o le matou feiloaiga sa faamoemoe e fai ai le tulaga lea. Ia e i ai ona tulaga faigata ua fetau foi i lenei taimi ona ua le mafai ona feoi o latou aua e tatau ona i ai le tagata e i ai le fomai e masani i le faiga. Ae o le SAFROM sa i ai le faamoemoe e aumai ai o le upu e to ia te au o le egg, o le fuamo po o le egg e aumai e le tui e faga i totonu o le tino o le povi, ia ona faamai ai la o le povi, fanau mai ai le tamaipovi.

Lau Afioga o le tulaga lena e pei o le tulaga lea na e fesiligia, ae...

**Afioga Fuimaono Teo Samuelu Teo:** Ia faafetai o lea ua manino atu, pau le mea o le tau malaga mai o le tagata mai i fafo, ae o lo o i ai le tagata sa feoi ma le alii lea o Dan Wakefield. E pei o le tagata tonu lea sa aumai le polokalama ma faaaogaina, o lea e i i le itumalo o Anoamaa. E malamalama lelei i ai le Afioga ia Fonotoe, ia o la e nofo i luga o la e vaai foi le tulaga o faatoaga a uta i lena vaega, ma le agaga faaaloalo pe a manaomia le fesoasoani.

**Tofa Hon LOPAOO NATANIELU MUA:** Ia o mea lelei uma, leaga o tagata ia o le tou Ekalesia, ia o le matua matautia o tagata nei. O tagata atamamai ia aua e fai mo mea o le tatou Ekalesia i o i Utah, tagata e fai ia latou lafupovi tetele, ae fai i le uso e susu mai e vaai le Matagaluega ma talatalanoa. Ia a faapea foi lava e a, ia o lea po o ou te toe sau uma le vaiaso lea uma le palota ou toe sau foi, ou te i ai lava ia, fai i ai e sau ma te talanoa lau Afioga i le sui usufono mamalu.

Ae ui i lea, e te le i i ai i i ae na talanoaina lafumanu ua ala ai ona ou tali atu. Ia lau Afioga i le Fofoga Fetalai, o lo o i ai le faamoemoe o le tatou vaega o faigafaiva e fai le latou research centre i o i Toloa e faalautele ai ia le latou Ofisa la e i ai ma le tatou station la e i ai, e le gata mo le faafaileleina o tatou faisua ma isi figota faitino faapena, ia o le a tilotilo foi pe i ai se auala e faateleina ai mo le ulasami, alogo vai ia tatou alogo te i faifai mou atu tatou alogo, ia o tatou tifitifi, ia e moni lava e feita i le avaava, ae avaava e i ai foi le latou aoga i le tatou siosiomaga o le sami. Ia o le tulaga lena e i ai le faamoemoe lea o le tatou Matagaluega, ae ua uma ona secure ia le fanua e fai ai.

Lau Afioga i le Fofoga Fetalai, ona ou oo mai lea i le tatou falesuesue i Nafanua. Muamua, o le mafuaaga na ala ai ona ave le suesue o Faatoaga i lalo o le tatou falesuesue i Nafanua, ona o le manatu o le tele ia o saienitisi, fomai, polofesa, Doctors ia ma Masters, ia ma latou e fai ia faailoga maualuluga. I nei vaega aua o au ia a matou talanoa ma polofesa la e i uta, o isi taimi foi pei lava sa ta nofo i le train, te i lava ua ta oo i fea ea, ae o lea ta te le iloa po o fea na ta oso atu ai. Pe a talanoa, leaga lava tagata e

popoto ma atamamai. O le ala la lea, o le a la le mea e le ave faatasi ai ia le tatou research nai a tatou fanau i uta? Tuu faatasi ai i o, e i ai mo le mea o le knowledge sharing. O lea la ua i ai le tulaga lea, ae o le vave ia o latou mea la e fai, e i ai le fai, ou te oo atu i le fai i se taimi leaga o la e sauni mai le sui o fai. E i ai se taimi ou te talanoa ai i le tulaga lea...

Ae o le tele ia o le aoga o le faamoemoe lea na ala ai ona fai, e le i fai fua, o lo o vaaia foi i le taimi nei, o le vave o le faatinoia ona o la e i ai masini. E tele atu equipments na i lo si vaega lea sa i Nuu. O le mea la e tuu, e taumafai e avatu masini i o i Nuu. O le a le mea e le aumai ai tagata ave faigaluega faatasi i mea la e i ai masini. Aua o le taimi foi na i ai, na alu Mose i luga o le mauga. This time, the mountain goes to Moses. Ioe, e faapena la le mea lea na fai nei i le aitia lea na fai, ma o lo o galue lelei le faiga o lea mea. Ia ona lipoti atu lea faapena, ona sa lagona foi i le isi taimi se faamatalaga foi ua le o se gaioga sa le tataua ona fai.

A ou alu atu i le SROS, na fai lau tala i ai i le taimi na oti ai le tamaloa lea o JF Kennedy, na fai ai le tala a lona uso o Robert Kennedy fai mai, 'some men see things and ask why, but some men dreams of things, and ask why not.' O isi tagata e miti i mea e vaai i mea ma fai mai aisea? A o isi tagata e miti e le o vaaia, ae fai mai aisea e le mafai ai ona fai?

O le galuega o lo o faia nei i totonu o le Matagaluega o Suesuega, o le suesuega o le kanesa, la e fai. E i ai ia tatou laau e maua galulue faatasi le tatou Matagaluega o se faiga lelei lea o le Pulega ma le Board, ma le Taitaifono, o le aumai o tatou taulasea, aumai fetufaai ia latou ideas. Ae e pau lava lata faaoololomaau i nai toeaiina, i nai tagata se alofagia, leaga o le tomai faapitoa foi na i ina tagata e fai se auala e puipuia, avatu se pepa i le Kapeneta, e taumafai e puipuia ai nai ideas a nai tagata na. Ia ae o se mea lelei ua i ai laau ua faapea ona maua i totonu o lo tatou atunuu ua faapea ona maua ai le togafitiga mo le tatou kanesa. Ae e tele lava le galuega o lo o faatino pea.

E le gata i lena, o le la lea e maua ai ia le tatou paoa, Solar Power.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai....

**SUI FOFOGA FETALAI:** Malie le Minisita se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Na pau le mea e fia fesili atu, e mafai ona tau mai nai laulaau se 2?

**SUI FOFOGA FETALAI:** Ia, e taua foi, saunoa lau Afioga i le Minisita...

**Tofa Hon LOPAOO NATANIELU MUA:** Lau Afioga, ia e muamua lava ia le sasalapa, ioe, sasalapa o lona lau e mafai ona fai ai le ti, e faala lava ona aumai lea tuu i totonu pe aumai sao lava lau lanumeamata tuu i ai, ia e faapena foi i le sua o le sasalapa. Ia ma le monavi. O le monavi la, a faapea la tou te fia iloa aua o lea ua transfer uma lava i ai e le Taitaifono ma le Pule i le Afioga ia Tuitama le faia o le laau lenei, ona e i ai le faaeteetega, o le laau lenei e matautia, e ola uma musele o lou tino. E leai se musele o le tino e le toe... toetiiti lava e vaai atu i le flow o lou blood i totonu o ou musele. A outou vaai la i tagata ia pei o le Afioga ia Sala Pinati, e le iloa po o le vai lea o la e na te inuina e faamalosi ai tele lona tino. Ae ui i lea, e faapena, o le mea la lena e ala ai ona ave le tatou... Ae o le tasi lena laau e matuai lelei mo le togafitiga o mai, o le laau lea o le monavi, e maua i totonu o le tatou atunuu, toe faigofie ona ola.

E le gata i lea, i mea faigofie lava foi lele o le lau salako. O le tasi lena laau e ese lou fefe ai.

**SUI FOFOGA FETALAI:** Malie le Minisita se i saunoa mai lau Afioga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, a o le i see ese le... o se lau vi? O le lau o le vi? O le fesili.

**SUI FOFOGA FETALAI:** Lau Afioga i le Minisita.

**Tofa Hon LOPAOO NATANIELU MUA:** O le igoa o le laau o le monavi, monavi. E le o Simona foi lele le uo aumeamamae a le Afioga ia Afamasaga, a o monavi. O le monavi le igoa o le laau. O le laau a e tilotilo i ai, e tai foliga foi i le isi taimi, o le isi lava taimi e te tilotilo pei lava se tamaligi foi lele lona lau ae vaivai, e le malo tele lona stem, lona ogalaau. A o le vave pe tolu vaiaso ua faapea le maualuga o le laau. Ae o le matua aoga lava. E le aoga i lau Afioga Tafua, ua fai sina matua tele o lou olaga ma lou soifua e faapena foi... e le aoga...

**SUI FOFOGA FETALAI:** Se i tuu atu lava le avanoa i le Minisita o Tagata Tafafao Maimoa mai Fafo.

**Afioga Hon Sala Fata Pinati (Minisita mo Tagata Tafafao Maimoa Mai Fafo):** Lau Afioga i le Fofoga Fetalai, faafetai i le avanoa. Leai o lea ou te maua ua lavea foi foaga e le i fai misa. O le fesili lea na ou faalogo ua taua lou nei tagata faapea o... ia o le monavi lea na aumai e Mose i aso ia, a o lea e maua mai Asau le monavi. Lona uiga o Seepa la lea na aumaia i i i Asau, ia ona oo mai ai lea i Lealatele ia matou, aua foi o aso ia sa sopo

tagata Samoa. Ia ae omai foi lea e faatau tapaa ona omai lea momoe i i ia matou. O i ina la na auai ai le monavi lea. Ou te le i tofo la i le monavi, a o le fesili la o lea ou te fia maua. O a uiga o le monavi, a o le a lona aoga, aua o lea ua taua au, e le o le monavi. O lou lava ulavale lea na tupu ai le mea. A o lea la e fesili i i, se i aumai sao lava auga o le monavi. Ma le faaaloalo lava.

**SUI FOFOGA FETALAI:** Faafetai. Malie lau Afioga i le Minisita, se i tuu le avanoa i le Afioga i le Tuiatua Faanofonofa leaga o lea na e taua lona suafa. Saunoa Tafua.

**Afioga Tafua Maluelue Tafua:** Faafetai lava. O oe lava o le Fofoga Fetalai lau Afioga. Faafetai. E ese lou agavaa i le tofiga. E leai, ou te tulai atu lava ma le agaga faaaloalo e lagolago si ou uso o Sala. O ta ita ia e le manaomia lava ni vi ea po o ni a. A o lea faatoa ou manino nei, o le mafuaaga lea e ala ai ona o soo le FAST i Savaii i Asau, ona o lea e manaomia le monavi ea po o le manogi vi. Ae toaga pea e toto le mea. Faafetai i lau Afioga i le Minisita.

**SUI FOFOGA FETALAI:** Ia, leaga o lo outou tiute lea o le faamaninoga, le Kapeneta, tuu atu le avanoa i alu Afioga i le Minisita o Pisinisi, Alamanuia ma Leipa.

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** Faafetai faafetai lava i lau Afioga. Faafetai foi i le Afioga i le Minisita o Faatoaga, o lea ua fou foi taliga i faalogo atu i lea foi taumafaiga. E masani lava ona tau mai e le Afioga ia Tuitama le la pisinisi lea o le tau faaolaga o le lauu lea. Leai ua ou tulai atu lau Afioga, o faamaumauga, leaga o lea na taua lou igoa, o le faalua lea ona ou lavea i mea nei. E tusi mai i i ia ou sau foi i le isi aso ou lavea foi. O lea foi la ua taua mai e le Afioga i le Minisita, o au lea e pei o au lea ua middle man i le mea lea o le monavi. Ae tutusa lelei lava maua ma le Tuiatua Faanofonofa leaga e i ai o ma sootaga i tua i le matamatagi. E le manaomia na mea, o la e alu lava le toto ia i le mea e masani ai, e le manaomia ni vailaau ma ni monavi, atonu o si ou tama lea o le a malolo, ia atonu pe aoga ia te ia. Ae faamolemole pe mafai ona aveese lota igoa ma tatou faamaumauga i te i ua sau se isi i se aso faapea, sole, vaai i le toeaina lea sa ola i le mea lea. Ia ae leai, ou te le faaaogaina lena mea. Ma lou faaaloalo.

**SUI FOFOGA FETALAI:** Ia, masalo o lea sa manino lava, e le o le nervous system o le blood circulation le aoga o le... ae ese ai lava le nervous system lea e master ai oulua. Ae e i ai foi upu o le talalelei, amuia le tuuaifuaina. Lau Afioga i le Minisita, ou te manatu o oe o le tagata o le

talalelei. O le mea la lea, ia, faatea i nuu le aina ia saunoaga ae alo le tatou faiva i luma.

Se i tulai mai lau Afioga i le Minisita mo Tina ma Tamaitai.

**Afioga Hon Tuitama Talalelei Tuitama (Minisita mo Tina ma Tamaitai, Atinae o Nu'u ma Afioga ma Agafesootai):** Lau Afioga i le Fofoga Fetalai, se ua ou tulai atu ona o lea e pei o lea e taumate le laau lea. Ae o le laau lea ona e le i faamatala lelei e le Afioga i le Minisita, o lea na faamatala mai ia te au le aoga o le laau, ae na iloa mai i le isi fomai. O le aoga la o le laau faapea e dilate ai mea o blood vessels ma aoga la e faasaoasaoa ai le alu o le toto. O le version la a le fomai lea sa ave i ai leaga ai e faamatala gata e le Afioga i le... ona e leaoga ia te ia, e aoga i le fatu. Manatua foi la, mo se faataitaiga i le mea lea sa aafia ai nei le Afioga i le sui usufono i lona taotoga foi lea sa fai i Niu Sila lea e faapea na mafua ona e vaiti alatoto o le fatu. O le fatu lava ia e i ai lava lona ia blood supply e tau la lea o le coronary tree po o coronary arteries lea e sapalaia le fatu lava ia. A i ai la se alatoto o le alatoto lea e poloka, o i ina la lea e maua ai le mea o le mai fatu oso faafuasei pe fatu pe ma maliu faafuasei ai tagata i mea ia pe a poloka se tasi o artery o le coronary tree lena po o le coronary artery o le fatu. O le laau la lea e taua e le Afioga e faapea la o lona aoga, e dilate ai la alatoto ia o le fatu, ae le faapitoa la i le fatu, e dilate atoa ai lava ma isi alatoto o lou tino. Ia o le aoga la lena pei o se aoga lena o le medical use la lena e aoga e faagasolo lelei ai lou toto aemaise o alatoto o la ua tau punitia. Ia o le aoga la lena sa ou aisi ai i le Afioga i le Minisita, se aumai la se laau sou tago e toto. Na aumai la le laau e ola, ae toto atu le laau ae pe. Ia e faapea le laau e le i i ai se lau o la e i ai nei ia te au, lea lava e faatalitali po o le a se taimi e ola ai. Ae tele laau ua ola lelei, o la e i le Afioga i le Minisita.

Ia, lau Afioga o le faamalamalamaga lea o le vaega lea.

**SUI FOFOGA FETALAI:** E le o lea ua manino le faamalamalaga o le saunoaga a le Afioga i le...

**Afioga Fuimaono Teo Samuelu Teo (Falealili Sasae):** Lau Afioga i le Fofoga Fetalai, ia, e sao lelei lava. Ou te faafetai i le Afioga i le Minisita mo le faalauiloaina o le laulaau. E tele lona aoga. A ou matau i le Minisita e pei e le paleni lana alu. Pe le tatau ona inu ai i le monavi lea ina ia ola ai uma alatoto. Seuseu faamolemole ia ave le monavi e inu ai le Minisita ia ola ai alatoto o le Minisita. Ma le agaga faaaloalo.

**SUI FOFOGA FETALAI:** E i ai le manatu o lea ua manino lelei le faamaninoga o lea mataupu. E i ai le manatu o le Nofoa, malie ia sui usufono mamalu o le Palemene, o lea o le a tatou faasee ese ma mea ia o

laulaau, e ese le taua o le monavi, o lea ua faafofoga le atunuu e taua mo tatou.

Lau Afioga i le Minisita ou te tapa ina ia faaauau lau saunoaga.

**Tofa Hon LOPAOO NATANIELU MUA:** Faafetai. O lea ua matuai manino auofala i le faamalamalamaga a le Afioga ia Lautafi aua o ia o le fomai. O le mea lenei sa ai ona... Oi, sorry, ia Tuitama, sorry pardon me Lau Afioga, na o lou sese lava ia Lautafi. E i ai le mea lea tupu i le aso lenei. O le Afioga ia Tuitama, aua o ia o le fomai, e mafai ona malamalama i tulaga faapea. O le mea foi lenei na ala ai ona faasoa i ai aua se feedback mai ai, ae i le isi faapuupuuga uma o le isi tau faamalamalamaga uma a le Afioga i le Minisita lea sa aumai, o le substitute o le Viagra.

**SUI FOGO FETALAI:** Ia, malie le Minisita se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, masalo a matau pe a ma le 3 tausaga talu ai sa sau ai se savali a ni fomai mai Amerika i Saute e fia faatu se latou falemai iinei i Samoa, lea foi sa ou faalauaitete mai. Ona e 2 ituaiga togafitiga faafomai e togafiti ai le tele o gasegase. E togafiti i tulaga ia i a tatou fomai, tui, tipi, aveese se vaega o le tino ua gasegase. Ae i ai la le isi ituaiga fomai, e 5 foi tausaga o aoga ai, e faaoga la herbs, ia laulaau, ma e i ai le tala lelei lava na ou vaai i ai i le ata, o se tina i Amerika. O se tina ua lavea i le cancer, ona fai lea o lona tapenaga o le a treat i le chemo ae peitai la ua fefe le tina lenei e fai lona taotoga, ona alu loa lea i le isi la ituaiga fomai lea, e le togafitia e musu e togafiti i togafitiga ia masani faafomai, a ua agai loa e togafiti i vailaau la ia. O le mea maoae, o le fomai e ana le falemai lea, o ia lea o le top American Surgeon i ituaiga tomai uma ia e lua, e le gata o le togafitiga tipitipi masani, ma le togafitiga e faaoga i ai mea o laulaau. O lea la ua alu loa i ai le tina lea, se i aumai lava sona opinion. Ia manatua la o le tagata lea ua alu i ai o le top American Surgeon, Fomai Tipitipi, a o le top American Doctor foi o ituaiga togafitiga ia vaifofo i laau. Ona aumai loa lea o lana faaiuga, e mafai ona togafiti oe e fofo i taumafa ma laulaau, ae sili atu ona taugofie ma faigofie lenei. E 6 masina na nofo togafiti ai le tina lea, ae na o taumafa lava, taumafa eseese, ona o taumafa ia e faamalosi ai le autau foi lea o le tino, immunity system. E 6 masina, na o taumafa lava o mea o fruits ma mea o vegetables na aai ai foi ma isi gasegase o le cancer. O ina lea na 6 masina ae toe sue atu ua leai se cancer, ua fofo. O lea la sa ou manatu ai e aumai le kamupnai lea ae te i ua toe logo mai ua le talafeagai le tulaga tau tupe, ma o mafuauga foi na o lea e i tua o le agai o le tatou SROS e fai a latou suesuega uma lava i ituaiga vaifofo lea e i

inei o Samoa ona o le talitonuga o au ma Minisita o le Kapeneta, e i ai kanesa ua le mafai ona fofu i tulaga masani ia, ae mafai ona fofu i le ituaiga lea o le faaaogaina o mea o vai Samoa. Ma o mea lava ia sa fofu ai tatou a o le i omai papalagi.

Lau Afioga i le Fofoga Fetalai, o le background atoa lena o le faamatalaga lea e aumai, lea e agai foi i ai le tatou SROS, ma ua tele lava le galuega ua maea ona fai i mea ia o suesuega ua oo foi i ai ma tatou, ona e ese foi laau a Samoa ia. E le faapea e tutusa uma laau e ola i atunuu, ae le iloa po o le tatou atunuu lea e ola ai isi laau e mafai ai ona fofu gasegase ia o le tino lea e faigata ona maua ni togafiti faaneionapo, le isi tomai lea faafomai.

Lau Afioga i le Fofoga Fetalai, o le taua lena o le mataupu lea i le mafuaaga sa ou fesili ai, ona o le galuega lea a le SROS e taua tele pei ona faatonuina ai e le Kapeneta ina ia fai a latou suesuega, pe i ai se taimi o i luma ona manuia lea o latou suesuega. O lona uiga, o lea e i ai le tulaga ua tatou oo i ai e ono maua ai lava i Samoa nei le isi foi lea ituaiga toomaga mo tatou tagata mamai.

**SUI FOFUGA FETALAI:** Faafetai mo le saunoaga a lau Afioga i le Taitai o le Maota. Ia, o le ala foi lea o le tuutuu atu o le avanoa e le Nofoa i a outou Afioga i Minisita, ia leaga o outou o lea e i le Kapeneta, you do have a collective responsibility e tou te tali mai ai ma faamanino faatasi le agaga o le tuuina atu o finagalo o sui usufono o le Palemene.

Ia, malie lau Afioga i le Minisita o Faatoaga, talu ai o lea ua tatou taunuu tonu lava i le taimi e faamaea ai a tatou galuega mo lena taeao. O lea ou te faasilasila atu ai ma le agaga faaaloalo, o le a faataatiaese Galuega a le Fono Aoao Faitulafono seia aulia ma toe tauaofia i le itula e 6:00 nanei i le afiafi. Faafetai.

*Na faataatiaese Taulumaga a le Fono Aoao Faitulafono i le itula e 1:00 i le aoauli seia aulia le itula e 6:00 i le afiafi.*